

Menge Erubasa

Is Ketuyuan te menge Erubasa

1 ¹Iyan heini sikan is menge erubasa ni Solomon he anak ni David te hadi diyà te Israel.

²Heini he menge erubasa, ebpekevegey te ketau wey ebpekemansu kenikew, ne egkesavut nu is mezalem he menge lalag he ebpekevegey te ketau. ³Ebpekemansu heini kenikew para mehimu ka he uluwanen, he ebpengungubpaan te hustu, metazeng, wey mezait he menge ulaula. ⁴Ebpekevegey heini te ketau te wazè din ketau, wey ebpekevegey heini te keuluwanen te menge vetan-en te ked-isip-isip ke hengkey is hustu. ⁵Pinaagi te kebpevineg kayi, ne egkeumanan pa is ketau te menge uluwanen wey egkegiyahan is duen din menge netuenan, ⁶su wey zan mesavut is ibpesavut te menge erubasa, menge sempità, wey menge peentukà te menge metau.

⁷Is kedtahud te NENGAZEN iyan ebpuunan te hustu he ketau, piru is tulebung he etew kenè din egkesuatan is hustu he ketau, ne kenè din daan egkesuatan he metulid is mezaat he vetasan din.

Is menge Sambag emun duen Lalung he menge Etew

⁸Mama, peminega nu is sambag ku ne kenè nu iniyugi is penurù te ginikanan nu. ⁹Is penurù dey ebpekevegey kenikew te meupiya he vetasan iring te kuruna he menge vulak etawa velieg he ebpekevegey kenikew te mekempet he kedezagwey wey zengeg.

¹⁰Mama, kenè ka peuwit te menge mekesesalà. ¹¹Emun ke sikandan te, “Duma ka kenami su ed-ayan kiw, ne edhimetayan tew is edsagad minsan pa te wazà mekesalà. ¹²Is edsanggar ziyà te kenitew ne kenè tew en edsemaan te gehinawa. ¹³Su emun egkepatey tew sikandan egkaangken tew is mahal he menge azen dan su wey mepenù is menge valey tew te menge azen he tinakew. ¹⁴Duma ka kenami ne emun egketigayun kiw en, ne ebehinen tew is tinakew tew.”

¹⁵Mama, kenè ka zuma te menge etew he iring dutun, kekenà, likayi nu sikandan. ¹⁶Su utew sikandan megaan he ebaal te mezaat wey ebunù

te etew. ¹⁷Wazà pulus te penuges te tagbis emun netuenan en dutun te menge tagbis he edtugesen nu sikandan. ¹⁸Ne iring kayi is tulebung he menge etew: ne iring dà te iyan dan edhimatey te lawa zan etawa iring dà te iyan dan ed-eyanan is keugelingen dan. ¹⁹Iyan heini egkehityavù te menge etew he mid-angken te ketigeyunan pinaagi te mezaat he paagi. Haazà is paagi, iyan kes dalam pehendiyà te kemetayen.

Is Rimegas te Kedselikwey te Ketau

^{20,21}Is ketau, iring te sevaha he etew he edwali te mezaging diyà te menge zalan, menge pelasa, menge mirkadu, wey ziyà te menge pultahan te menge inged. Ke sikandin te,

²²“Sikiyu is menge wazè din hanew, taman te taman en be he iring kew kenian?

Sikiyu is menge mesudi, taman te taman en be is kegkelipey niw te kedsudi?
Sikiyu is menge tulebung, taman te taman en be he kenè kew egkesuat he mebmetau?

²³Mebpezumazuma kew te kedawey ku keniyu.
Guntaan, egkegiyen ku keniyu is egkeisip ku;
ibpetuenan ku keniyu is egkegiyen ku keniyu.

²⁴Tenged te kenè kew ebpezumazuma te ked-umew ku wey kenà a keniyu edsegipaan,

²⁵ne tenged te mibey-anan niw is menge sambag ku wey kenè kew egkesuat he ebpepenurù,

^{26,27}bà ku zà sikiyu ed-engiti emun ebpekebmeregen kew;
bà ku zà sikiyu ed-un-undaha zutun te kemeregenan wey mekahandekhandek he egkeulaula niw he iring te eribpures.

²⁸Ne ed-umawen a keniyu, iyan, kenà ad edtavak;
ebpen-ahaan a keniyu, iyan, kenà a keniyu egketuredu.

²⁹Su geina te kenè kew egkesuat he ebpenuruen wey wazè niw kedtahud te NENGAZEN.

³⁰Wazè niw segipaa is menge sambag ku wey wazè niw itetenged is kedawey ku keniyu,

³¹ne egkeragun niw is mezaat he menge begas te vaal niw, wey is menge mezaat he pelanu niw.

³²Su is kewewali te etew he wazè din hustu he ketau iyan ibpatey zin, ne is kebpeeyehy te tulebung iyan ebpekezezaat kandin.

³³Iyan, is ebpeming kedi, dezeyaan is kebpekesavuk din.
Ne kenà sikandin egkehandek he egkekeizan.”

Is menge Keupiyaanan he Egkezawat ta te Ketau

2 ¹Mama, tentenuzi nu is menge penurù he idsugù ku kenikew ne kenè nu lipati. ²Peminega nu is menge penurù he ebpekevegey te

ketau wey te meupiya he kedsavut. ³Peniguduwi nu he mekaangken ka te kedsavut, ⁴iring te kebpeniguduwi nu kebpen-ahaa te selapì etawa nekeeles he ketigeyunan. ⁵Ne emun egkeveelan nu heini, egkesavut nu is kehulugan te kedtehuza te NENGAZEN, wey egkesavut nu is ketau mehitenged kandin. ⁶Su is NENGAZEN iyan ebegey te ketau. Ne iyan daan sikandin ebpuunan te keuluwanen wey kedsavut. ⁷Egkelesagan din wey edtegenahan din te kezeegan is minge metazeng is minge ulaula, ⁸su wey sikandan is minge metazeng wey minge metinumanen, ne egkepengelangan din sikandan dutun te minge ebeelan dan.

⁹Emun ebpeming ka kedì, egketuenan nu ke hengkey is meupiya he ed-ul-ulahan: is hustu, metazeng, wey mezait he minge ulaula. ¹⁰Ne egkehimu ka he uluwanen, ne ebpekevegey heini kenikew te kelipey. ¹¹Egkehimu he kutè nu is hustu he kedsavut nu, ¹²ne iyan ebpekepelikey kenikew te mezaat he ebeelan wey te minge etew he egkagi te sayep. ¹³Heini he minge etew mid-awà diyà te metazeng he kebpengungubpaan, ne iyan mid-ikul zan is minge ulaula pehendiyà te merusirem. ¹⁴Igkelipey zan is kebaal te mezaat, ne igkelangan dan is kelelalung he ebeelan dan. ¹⁵Mezaat is ulaula zan; ne midsuwey zan puun te hustu he zalan.

¹⁶Pinaagi te ketau, ebpekelikey ka wey ka kenà metintal emun edtintalen ka te vahi he edsalàsalà pinaagi te minge lalag he ebpeketintal. ¹⁷Haazà he vahi nekidsuwey te esawa zin hein betan-en pa sikandin; wazè din en isipa is meupiya he minge penangdù din diyà te Megbevayà. ¹⁸Benar iyan, emun edhendiyè ka te valey zin ne iring te iyan nu ebayaan is kemetayen nu. Ne is ked-ikul nu te zalan pehendiyà te valey zin, ne iring te iyan nu ed-ikulen is dalan pehendiyà te iveyaan. ¹⁹Wazà ebpekehendiyà te kandin he ebpekelikù. Is ebpekehendiyà te kandin, ne kenè en ebpekeikul te zalan pehendiyà te ubpeey te minge uuyag. ²⁰Umbe, iringi nu is kebpengungubpaan te etew he metazeng; ikula nu is metazeng he minge ulaula zan. ²¹Su iyan ebpekeubpà kayi te tanè tew is minge metazeng; ne iyan kenà egkaawà kayi is wazà duen igkesewayi. ²²Iyan, sikan is ebpemen-ulaula te mezaat wey meluiven ne id-awà. Iring sikandan te sagbet he ebezuten.

Is Duma pa he minge Keupiyaanan he Egkekuwa ta Pinaagi te Ketau

3 ¹Mama, kenè nu lipati is minge penurù ku kenikew; tipigi nu ziyà te gehinawa nu is minge sugù ku, ²su pinaagi kayi edlugeyazan ka te untung wey ebmeuswagen ka. ³Kenè nu ewaa ziyà te kenikew is kebpekid-uunungen wey is kegkemetinumanen; ke và dà belieg ne ipurung nu ivevelieg, ne ke và dà litra ne isurat nu ziyà te gehinawa nu. ⁴Emun ed-ul-ulahan nu heini, egkezeligan ka ne ebpekepenunuat ka te Megbevayà wey minge etew, ne meupiya is kedtengtengi zan kenikew.

⁵Purung ka sarig te NENGAZEN ne kenè nu iyan serigi is kenikew he keugelingen he ketau. ⁶Minsan hengkey is ed-ul-ulahan nu ne isipa nu is NENGAZEN, ne iyan sikandin metau wey nu iyan meikul is metandang he zalan. ⁷Kenè nu isipa he utew ke en uluwanen, kekenà, tehuza nu is NENGAZEN, ne kenè nu ul-ulaha is mezaat. ⁸Iring heini te tambar he ibmeupiya te lawa nu. ⁹Begayi nu te zengeg is NENGAZEN pinaagi te kedhelaza nu te ketigeyunan nu wey te egkehuna he vegas te langun he menge pinemula nu. ¹⁰Ne emun ed-ul-ulahan nu heini, ne egkepeuluwan is budiga nu, ne edrepey te inumen is menge teleguey nu.

¹¹Mama, kenè nu isipa he mezaat is kebmansu te NENGAZEN wey kenè nu ikepes is kedawey zin. ¹²Su ebmensuwen te NENGAZEN is menge mibpelanggè din iring te ebeelan te sevaha he amey ziyà te anak din he pelanggè din.

¹³Utey zeyzey is etew he zuen din ketau wey kedsavut. ¹⁴Su zekelè pa is pulus kayi kenà is selapi wey vulawan, ¹⁵ne mahal pa heini kenà is menge elahas, ne wazà minsan hengkey he egkesuatan nu he ebpekerepeng kayi. ¹⁶Is ketau ne ebpekepelugayad te untung nu wey ebpekevegey zaan te ketigeyunan nu wey zengeg. ¹⁷Ebpekeugup heini te kebpengungubpaan nu wey te meupiya he kebpekesavuk nu. ¹⁸Utey zeyzey is etew he edtulung ebpepenurù su wey mebmetau; is ketau ebpekelipey kandin wey ebpekepelugayad te untung din.

^{19,20}Pinaagi te ketau wey keuluwanen, midlimbag te NENGAZEN is tanà wey langit, ne nemenlepew is menge serebseb ne nehimu is uzan pinaagi te gapun.

²¹Mama, tipigi nu is ketau wey keuluwanen nu. Ne kenè nu heini mehimuwa he maawà diyà te kenikew, ²²su ebpekevegey heini kenikew te melugayad wey mekempet he ked-ubpà. ²³Ebpengungubpaan ka he wazà ebpekekaid kenikew ne kenè ka egkemeni. ²⁴Emun edhizegè ka ne kenè ka egkahandek wey meupiya zaan is kedlizepeng nu. ²⁵Umbe, kenè ka ereg he egkehandek emun egketik-ew egkehitavù is mekahandekhandek he hitavù, etawa edezeetan is menge lalung, ²⁶su ebpekesarig ka he iyan ebantey kenikew is NENGAZEN, wey ka kenà mekeizi.

²⁷Tevangi nu is kinahanglan he edtevangen sumalà is egkehimu nu. ²⁸Ne emun duen ebpekitavang ne kenè nu en kèkeeselema pa is kedtevangi nu kandin emun duen en igketavang nu kandin.

²⁹Kenè ka mebpelanu te ebpekezezaat te sengeetew he uvayè nu he midsarig kenikew.

³⁰Kenè nu tebeka is sengeetew emun wazà mezaat he neveelan din diyà te kenikew.

³¹Kenè ka mesina te etew he mesipala ne kenè nu zaan iringi is menge ulaula zin. ³²Su egkeepesan te NENGAZEN is etew he mesinupaken, iyan, ebpekid-emigu mulà sikandin te etew he metazeng.

³³Edrewakan te NENGAZEN is pemilya te etew he mezaat is menge vaal zin, iyan, edtuvazan din mulà is pemilya te etew he metazeng.

³⁴Edsudien din is menge mesudi, ne edtuvazan din is kenè mepelevawen.

³⁵Is menge uluwanen, ne egkezeligan, piru is menge tulebung ne egkepeel-elezan.

4 ¹Menge anak, purungi niw peminega is menge penurù te amey niw, su wey zuen niw metueni. ²Meupiya is penurù ku keniyu umbe kenè niw iselikwey. ³Siak, hein batè e pa, is budtung he anak te ginikanan ku, pinelanggà a te iney ku. ⁴Mibpenurù a te amey ku. Migkegiyan e zin te, “Ipurung nu itagù diyà te isip nu is menge penurù ku. Layun nu tumana is menge sugù ku su wey mebmelugayad is untung nu. ⁵Peniguduwi nu he maangken nu is ketau wey kedsavut. Kenè nu lipati is menge lalag ku kenikew, ne kenè nu heini suwayi. ⁶Kenè nu iselikwey is ketau, kekenà, mahala nu heini su iyan heini ebantey wey ed-elima kenikew. ⁷Is ketau etawa is kedsavut iyan utew impurtanti he kinahanglan te etew, umbe penigudu ka wey nu maangken heini minsan maamin pa is langun he azen nu. ⁸Mahala nu utew wey tipigi nu is ketau, ne pinaagi kayi egkevantug ka. ⁹Iring heini te kuruna he menge vulak he ebpekevegey kenikew te kekempet wey zengeg.”

¹⁰Mama, peminega nu wey tumana nu is menge egkegiyen ku su wey ka lugeyazi te untung. ¹¹Mibpenurù ku en sikew ke ebmenmenuwen is kebpengugubpaan he egkezumahan te ketau wey kebpurungpurung. ¹²Emun edtumanen nu heini, wazà egkehimu he velavag te kebpengugubpaan nu, wey wazà mezaat he egkehitavù kenikew. ¹³Pekezeseni nu te egawed is penurù ku; kenè nu itugut he maawà diyà te kenikew, pekeventayi nu su iyan heini untung nu.

¹⁴Kenè nu iringi is menge vaal te menge lalung. ¹⁵Likayi nu heini ne pedeyuna nu is metazeng he kebpengugubpaan. ¹⁶Su kenè dan ebpekelipezeng emun kenè dan pa ebpekevaal te mezaat etawa ebpekependelahig te zuma. ¹⁷Is mezaat he menge ulaula wey is kebpsipala, impeiring dan te keenen wey inumen.

¹⁸Is kebpengugubpaan te menge etew he metazeng ne igkepetug-iring te aney en he kedsilà te andew ke egkepawà he ebmerayag taman te meudtu. ¹⁹Ne is kebpengugubpaan mulà te menge etew he mezaat is menge ulaula zan, igkepetug-iring te utew merusirem, ne kenè dan egketuenan ke hengkey is hinungdan te kegkezeeti kandan.

²⁰Mama, purungi nu peminega is menge penurù ku kenikew. ²¹Tentenuzi nu heini, ne tipigi nu heini ziyà te gehinawa nu. ²²Su ebpekevegey heini te meupiya he kedlelawa wey melugayad he untung te edawat kayi.

²³Purungi nu pekeventayi is diyà te isip nu, su ke hengkey is ed-is-isipen nu, iyan daan egkeveelan nu. ²⁴Iselikwey nu is mezaat wey is mahawag he

kekgagi. ²⁵Tengteng ka ziyà te egkehunaan wey ziyà te minge meupiya he minge vutang. ²⁶Ikula nu is hustu he zalan su para wazà mezaat he egkeulaula kenikew. ²⁷Pengungubpaan ka he metazeng; likayi nu is kebaal te mezaat.

Petizaan Mehitenged te Kedsalàsala

5 ¹Mama, purungi nu peminega is minge lalag ku he egkezumahan te ketau, ²su wey nu ikepaahà is hustu wey kedlalag he egkezumahan te ketau. ³Is lalag te vahi he mengungumpadi meemis pa te teneb, ne is kekgagi zin ebpekevihag iring te idhamham he lana te ulibu. ⁴Piru ziyà te egkehuziyanan is igketagak din diyà te kenikew iyan is keseengan wey kemeregenan. ⁵Emun eduma ka kandin ne edumahan ke zin diyà te lugar te minge minatey; is dalan he ed-ikulen din ne ebpekepehendiyà te kemetayan. ⁶Wazè din segipaa is dalan pehendiyà te untung. Bulegkù is dalan he ed-ikulen din, ne wazè din heini metueni.

⁷Umbe, minge anak, peminega a keniyu wey pezumdumahi. ⁸Likayi niw is bahi he mengungumpadi, minsan is ked-uvey zà diyà te gemawan te valey zin ne kenè niw ul-ulaha. ⁹Su emun ebeelan niw heini, egkaawà is dengeg niw ne egkaangken heini te zuma, ne edhimetayan kew te minge etew he wazà kekgahizu. ¹⁰Ne is langun he ketigeyunan niw wey is duma pa he hineguan niw egkuwaan te minge lumelengyawà. ¹¹Ne ebpekezag-es kew emun edserupatey kew en, ne egkegugus en utew is lawa niw. ¹²Ne ebpekekagi kew te, “Geina iyan te igkeepes ku zà is kebmensuwa kedì; geina iyan te midsupak ku is indawey kedì. ¹³Wazè ku peminega is ebpmenurù kedì. ¹⁴Umbe, iyan nepengkusan ku is hapit a egkepeel-elezi ziyà te etuvangan te nevrurun he minge etew.”

¹⁵Iring te ed-inum ka te wahig he ebpuun te sekezuwè nu, iyan nu zà daan hileveti is esawa nu. ¹⁶Kenè nu itugut he egkehimu ka he iring te serebseb he minsan hentei zà he vahi is ebpekekuwa wey ebpekeinum duen. ¹⁷Kinahanglan he para zà heini keniyu te teleesawa; ne kenè niw heini pegezami te zuma. ¹⁸Umbe, lipey ka pinaagi te esawa nu, ne verakat he tuvazi sikandin te Megbevayà. ¹⁹Mekempet sikandin wey ebpekahalin te gehinawa su iring is kekempet din te nati he selazeng, umbe zeyzey ke mewili ka kandin wey layun nu egkeisip is kebmahal zin.

²⁰Mama, kenè nu iyan isipa is bahi he mengungumpadi. Kenè nu iyan egkesuati is esawa te sengememaama. ²¹Su egkaahà te NENGAZEN is langun he minge vaal nu. Ne minsan hendei ka ebpevayà ne egkeehè ke zin. ²²Is mezaat he minge ulaula te lalung he etew iring te litag he ebpekehiket kandin. ²³Ebpatay sikandin tenged te kebpezumdumahi zin te mezaat he suat te lawa zin. Is ketutulebungi zin iyan ed-uwit kandin pehendiyà te penlevengà.

Is Duma pa he minge Petizaan

6 ¹Mama, emun nenangdù ka he iyan ka ebayad te utang te sengeetew wey mibpesarig ka he iyan ka ebpenavak te televaken

te zuma, ²ne egkezeetan ka zutun te penangdù nu, ³ne zuen nu en televaken diyà te zuma. Piru iyan heini ul-ulaha nu su wey ka melibri zutun te penangdù nu ziyà te kandin: Hendiyè ka te kandin ne hangyù ka he tevangi ke zin he mekelingkawas ka zutun te televaken nu. ⁴Kenè ka lipezeng wey himeley taman te ebpekelingkawas ka. ⁵Libriya nu is keugelingen nu iring te selazeng etawa tagbis he nekaawà he nelitagan te mengenganup.

⁶Sikiyu is minge pegulen, ahaa niw wey istudyuwi niw ke mibmenumenu te minge lemetik is kedlagud te igkeuyag dan, para mehimu kew he uluwanen. ⁷Minsan wazè dan egalen etawa pengulu he ebmandar kandan, ⁸iyam, edtigum sikandan te egkekaan dan timpu te gulavung wey tiragun su para zuen dan mekaan emun tipenguzan. ⁹Sikiyu is minge pegulen, edtulung kew zè be edlipepezeng? Keenu kew en be ed-enuw? ¹⁰Hidhizegè kew, lipepezeng kew, pahareyharey kew, ¹¹ne egketik-ew egkehitavù diyà te keniyu is kewewezai he iring te kebpekeuma te negumeenan he tulisan.

¹²Is minge etew he wazè dan pulus wey is mezaat is minge ulaula zan, ne iyan dà idsuguksuguk dan is ebpemenudtul te tarù. ¹³Ebpemengendat sikandan wey ebpeuy-uyawà pinaagi te minge velad wey paa zan para te kedlimbung te zuma. ¹⁴Tenged te kebmesinupaken dan, layun dan ebpelanu te kebaal te mezaat, wey iyan sikandan ebpemuunà te samuk. ¹⁵Umbe, egketik-ew egkehitavù diyà te kandan is kezeetan; segugunè dan ebpekehendiyà te kezeetan ne wazè en paagi wey zan melibri.

¹⁶Duen pitu he kelasi te etew he egkeepesan wey edumutan te

NINGAZEN:

¹⁷is minge gelbuwen,

is minge teruen,

is minge memumunù,

¹⁸is minge ebpelanu te mezaat,

is minge elistu te kebaal te mezaat,

¹⁹is minge ebpemenistigus te tarù,

is minge edretem te minge kesamuk diyà te zuma zan.

²⁰Mama, sunuza nu is minge sugù wey ibpenurù te ginikanan nu kenikew. ²¹Ipemula nu heini ziyà te gehinawa nu su wey kenè nu heini melipati. ²²Emun edhipanew ka ne iyan heini egkehimu he giya nu, ne emun edlipepezeng ka ne iyan heini egkehimu he vantey nu, ne emun egkepukew ke en ne iyan heini edsambag kenikew. ²³Su heini is minge sugù dan wey minge penurù iring te sulù he ed-anlag diyà te kenikew. Ne is minge kedaway zan kenikew, ebpeketandang te vetasan nu, ebpekeugup wey ebpekepelugayad te untung nu. ²⁴Ne pinaagi kayi ebpekelikey ka te vahi he mengungumpadi wey kenè ka egkeuwit te mekevivihag he minge lalag din. ²⁵Kenè ka petintal tenged te kekempet

din. Kenè ka peuwit te mekevivihag he minge mata zin. ²⁶Su is kebpekidhilavet te vahi he ebelegyà te zengeg din, utew ebpekepepubri zutun te edhilavet, piru kedhilavet te esawa te zuma, ne ebeyazan nu te untung.

²⁷Is etew he edsepipi te hapuy, egketutung is bisti zin; ²⁸is edhipanew ziyà te vaga, egketutung is paa zin. ²⁹Ne iring din ded daan is maama he egkevut te vahi he zuen din en esawa su kenà ebpeseyluwen, kekenà, edsilutan sikandin.

³⁰Kenà edsudien te minge etew is tekawen emun iyan ibpenakew zin te keenen su geina te egkeumes en sikandin. ³¹Iyan, emun egkezekepan sikandin, ne ibpevyad sikandin te kepipitu edtekepa is bali zutun te midtakew zin, minsan pa ke pinaagi kayi egkeamin is langun he azen din.

³²Is etew he edhilavet te zuen din esawa ne kenà metau he ed-isip te hustu. Iyan dà sikandin ed-oney edezaat te lawa zin. ³³Ebpesekitan sikandin ne egkepeel-elezan taman te taman. ³⁴Ne is ebpengelikud he tegiesawa zutun te vahi he edhilevetan, ne utew egkererengiti, ne wazè din en kegkehizu emun ebelesan din is midsalàsala diyà te kandin.

³⁵Kenè din en edewaten is ibayad diyà te kandin ne kenè en sikandin egkepeypeyuan minsan sengemenu pa kezekelà is ibpayùpayù kandin.

7 ¹Mama, layun nu tumana is minge lalag ku ne kenè nu lipati is minge sugù ku. ²Tumana nu is minge sugù ku ne edlugeyazan ka te untung. Ne pekeventayi nu is minge penurù ku iring te ked-urami nu te mata nu. ³Ipemula nu heini ziyà te isip nu wey nu kenà melipati. ⁴Is ketau, isipa nu he iring te etevey nu, ne is kedsavut, isipa nu he iring te utew nu emigu. ⁵Tenged kayi egkelikayan nu is bahi he edsalàsala te esawa zin, wey te mekevivihag he minge lalag dan.

Is Bahi he Mengungumpadi

⁶Diyà te valey ku zuen timpu he midsulew a, ⁷ne neehè ku is minge vetan-en he minge maama he wazè dan pa utew pereg, ne nesusi ku he is sevaha kandan egketalengtaleng. ⁸Midhipanew sikandin pehendiyà te suyuk he zutun kes ed-ubpaan te sevaha he vahi he mengungumpadi. ⁹Mahapun en dutun ne malù en ebmerusirem. ¹⁰Ne midsinugung sikandin te vahi he mibivisti te iring te visti te vahi he ebelegyà te zengeg din, ne zuen din mezaat he pelanu. ¹¹Berèbaan heini he vahi ne wazè din keezezan. Ne layun en sikandin wazà diyà te valey zin. ¹²Ed-ayan sikandin diyà te minge kelesada, etawa ziyà te kada suyuk, wey ziyà te minge pelasa. ¹³Migkepekepan din sikan is maama, ne midhezekan din. Ne wazè en sikandin menawànwà is egkagi te, ¹⁴Midtuman ku geina is penangdù ku ziyà te NENGAZEN he ebpemuhat a, umbe zuen usa ziyà te valey. ¹⁵Umbe, mibpen-ehè ku sikew, ne meupiya su neehè ku sikew. ¹⁶Daan ku en he

mibpurungi te edempas is hizegaan ku te dikulur he manggad he linu he ebpuun diyà te Ehipto. ¹⁷Mibpehemutan ku en te menge pehemut he mira, aloe, wey sinamun. ¹⁸Ne hendiyè ki en, su ebpehulizà ki; ebpemulpulusan ta is kebpeked-erigè ta taman te egkepawà, ¹⁹su is esawa ku ne wazà diyà te valey. Meziyù is midhipenawan din. ²⁰Dekelà is selapi he mid-uwit din ne edlavey pa is dezuwa he simana ne human sikandin ebpekeuli.”

²¹Pinaagi te keungangen te menge lalag din neuwit din haazà is maama. ²²Segugunà sikandin miduma zutun te vahi, ne iring sikandin te tudu he vaka he eduma te edtuyuk kandin pehendiyà te lugar he zutun edlepa, wey iring te selazeng he ebpetandang en diyà te litag ²³he zutun edhimetayi pinaagi te panà. Iring daan sikandin te sevaha he tagbis he edhendiyè en te litag, wazè din metueni he kemetayen en bes is egkepengkusan din.

²⁴Umbe, guntaan menge anak, purungi niw peminega is egkegiyen ku. ²⁵Likayi niw is bahi he iring dutun, ne kenè kew peuwit kandin. ²⁶Mahabet en he menge maama is nengezeetan tenged kandin. ²⁷Emun ebpehendiyè kew te valey zin, ne henduen be te mid-ikul niw is dalan pehendiyà te kemetayen.

Kedeliga te Ketau

- 8** ¹Is ketau wey is meupiya he kedsavut iring te etew he edwali. ²Edhithitindeg sikandin diyà te metikang he menge lugar ziyà te kilid te zalan, diyà te menge suyuk, ³wey ziyà te menge gemawan te inged, wey ziyà te menge veyeey. Ne ebpengumew sikandin te, ⁴“Sikiyu is langun he menge etew, edlelagan ku sikiyu. ⁵Sikiyu is menge wazè din utew hanew, penigudu kew wey kew mebmetau. Sikiyu is menge tulebung, gemita niw is kedsavut niw. ⁶Pemineg kew su zekelà is pulus wey hustu heini is egkegiyen ku. ⁷Egkagi a te tutuu, su egkeepesan ku is kegkagi te mezaat. ⁸Tutuu is langun he egkegiyen ku; wazà tarù wey limbung he menge lalag ku. ⁹Is etew he zuen din kedsavut, ne utew zin egkekeleduwi is langun he menge lalag ku, ne wazà igkesawey zin duen. ¹⁰Ne isipa niw he lavew pa he mahal is penurù ku kenà te pelata, ne isipa niw zaan he lavew pa he mahal is ketau kenà te pinili he vulawan. ¹¹Su is ketau mahal pa kenà is mahalen he menge vatu, ne wazà minsan hengkey he egkesuatan te etew he ebpekerepeng kayi. ¹²Siak, is ketau, metau he ed-isip-isip ke hendei is hustu etawa kenà, wey netuenan ku ke ebmenmenuwen te ed-angken is ketau wey kedsavut.

- 13 Is langun he edtahud te NENGAZEN, igkeepes dan is mezaat.
Egkeepesan ku is kegkegelbuwen, is kegkemepelevawen, is mezaat he menge vetasan, wey is winali he menge lalag.
- 14 Metau a he edsambag, duen ku hustu he ketau. Duen ku meupiya he kedsavut wey gehem.
- 15 Pinaagi kediey ebpekezumala is menge hadi, wey edhimu is menge pengulu te metazeng he menge kesuguan.
- 16 Ne pinaagi zaan kediey ebpekezumala is langun he metazeng he ebpemendumala wey menge upisyal.
- 17 Ebmahalen ku is mibmahal kediey,
ne is ebpen-ahà kediey egketuredu e zin.
- 18 Ebpekevegey a te ketigeyunan, dengeg, keuswagan wey kezeegan he kenà egkahanew.
- 19 Is keupiyaanan he egkekuwa te etew he nekaangken kedì, mahal pa kenà is kuruna he vulawan etawa pelata.
- 20 Edsunuzen ku is metazeng wey is hustu.
- 21 Is mibmahal kediey ebegayan ku te ketigeyunan;
ebpenuen ku is teleguey zan te ketigeyunan.
- 22 Puun pa te puunà, daan e en dutun te wazè pa limbaga te NENGAZEN is langun.
- 23-26 Impelastar e zin en puun pa te puunà.
Daan e en dutun te wazè pa is kelibutan: is dagat, is menge serebseb, is menge vuntud, is menge vuvungan, is menge vevesukà, wey minsan pa is menge eliyavuk.
- 27 Daan e en hein midlimbag din is langit.
Daan e en hein insavuk din is mid-elangan te langit wey tanà.
- 28 Daan e en hein midhimu zin is gapun,
wey is menge ulu te wahig diyà te kinezizeleman,
- 29 hein midteltalan din is egketemanan te zagat su wey kenà medlapey,
wey hein insavuk din is menge pundasyun te kelibutan.
- 30 Hein mibpelanu wey mibpundar is NENGAZEN te langun kayi, diyà a is ketau te avey zin.
Iyan a igkeliwey zin kada andew, ne layun a melipayan diyà te etuvangan din.
- 31 Ingkeliwey ku is kelibutan he midlimbag din, wey is menusiya.
- 32 Umbe guntaan menge anak, peminega a keniyu,
su utew zeyzey is edsunud te menge lalag ku.
- 33 Peminega niw is menge penurù ku wey kew mehimu he uluwanen;
ne kenè niw heini iselikwey.
- 34 Utew zeyzey is etew he layun ebantey wey edtagad su wey mekepemineg kedì.
- 35 Is etew he ebpen-ahà kedì ne ebpeketuredu te untung,

ne igkesuat sikandin te NENGAZEN.

³⁶ Piru is etew he wazà meketuredu kedì, edezeetan din is keugelingen din. Ne is langun he egkeepes kedì, ne iyan dan egkesuatan is kemetayen.”

Is Ketau wey Ketutulebung

9 ¹Is ketau, iring te sevaha he etew he mibevalley te zekelà wey mekempet he valey. ²Ne nengemuran sikandin. In-andam din is menge keenen wey menge inumen. ³Ne midsugù din is menge suluguen din he menge vahi te kedhendiyà te metikang he menge lugar zutun te inged su wey zan ikepesayud heini: ⁴“Sikiyu is menge wazà hanew wey kedsavut, mid-imbita kew te kegkaan te gastu. ⁵Hendiyè kew wey kew mekekaan te keenen he in-andam ku, ne wey kew zaan mekeinum te vinu he integana ku. ⁶Kenè niw ipedayun is kedinulebung niw ne ebmeupiya is ked-ubpè niw, ne pengungubpaan kew zuma is kedsavut.”

⁷Emun edewayen nu is etew he mesudì, bà ke zin dà ed-insultuwi. Ne emun edewayen nu is lalung he etew, bà ke zin dà edsumpalita wey ed-ebusari. ⁸Kenè nu zewaya is etew he mesudì su và ke zin dà egkeepesi. Iyan nu zewaya is etew he uluwanen su ebmahalen ke zin. ⁹Penurua nu is etew he uluwanen ne ed-iseg pa is ketau zin. Penurua nu is etew he metazeng ne ed-iseg pa is netuenan din.

¹⁰Tehuza nu is NENGAZEN wey ka mekaangken te ketau. Kilelaa nu is Wagas he Megbevayà ne egkeangken nu is meupiya he kedsavut. ¹¹Pinaagi te ketau ebmelugayad is untung. ¹²Emun uluwanen ka, ne ebpekevegey kenikew te keupiyaanan, piru emun edsudien nu is ketau, ibpaantus nu zà is gehinawa nu.

¹³Is ketutulebung iring te sevaha he vahi he wazè din betasan, wazà memansu wey wazè din ketau. ¹⁴Ebpimpinuu sikandin diyà te gemawan te valey zin, diyà te vangkù diyà te metikang he menge lugar zutun te inged. ¹⁵Ne ed-umawen din is menge etew he edsagad he ebpemenhendiyà te menge terebahu zan. ¹⁶Ke sikandin te, “Sikiyu is wazè din pereg wey kedsavut, hendini kew.” ¹⁷“Is tinakew he wahig utew meupiya he ed-inumen, ne is keenen he id-eles is kegkeena zuen ne utew metaam.” ¹⁸Piru wazà mesayud heini he menge etew he is edhendiyà te kandin ebpatay. Is nekehendiyè en te kandin diyè en te iveyaan.

Is menge Erubasa ni Solomon

10 ¹Iyan heini menge erubasa ni Solomon: Is anak he uluwanen ebpekevegey te kelipey te ginikanan din, iyan, is anak he tulebung ebpekevegey te seeng kandan.

²Is ketigeyunan he nekuwa te mezaat he paagi kenà ebpekevegey te keupiyaanan. Is metazeng he kebpengungubpaan ebpekelibri kenikew te kemetayen.

³Kenà idtugut te NENGAZEN he mevitil is minge metazeng, iyan, kenè din ebmehimuwen he mekuwa te minge lalung is egkesuatan dan.

⁴Is kepepegul te etew egkehimu he iyan hinungdan te kegkeey-eyuwi zin. Ne is kegied te etew egkehimu he iyan hinungdan te kebpekaangken din te zekelà he ketigeyunan.

⁵Is anak he edezerengdeng emun timpu te tiragun uluwanen sikandin, iyan, is anak he vâ dà edliplipezeng emun timpu te tiragun, ebpekevegey te keelezan.

⁶Eduvazan te Megbevayà is metazeng he etew, iyan, is minge lalag te lalung he etew ebpekezezaat.

⁷Is metazeng he etew, egkehimu sikandin he tuvad te zuma ne layun sikandin egketenuzi, piru is lalung he etew egkelipatan en.

⁸Is uluwanen he etew, ebpezumdumahan din is minge sugù, iyan, is etew he sumalè en is ebpengegiyen din, ne kezeetan is egkepengkusan din.

⁹Is etew he metazeng meziyù te kezeetan, piru is etew he ebaal te mezaat egketuenan is salè din.

¹⁰Is etew he limbungan ebpekevegey te samuk, ne is etew he sumalè en is ebpengegiyen din egkezeetan.

¹¹Is minge lalag te etew he metazeng ebpekevegey te keupiyaanan diyà te zuma, piru is minge lalag te lalung he etew ebpekezezaat.

¹²Is kegkeepes ebpeketuvù te kesamuk, piru is etew he zuen din kebmalah ne ebpekesaylu te langun he minge sayep.

¹³Duen minge meupiya he penurù he egkekuwa ta ziyà te minge lalag te etew he metau, iyan, is engey ereg he ebmensuwen etawa edsilutan.

¹⁴Is minge uluwanen ebpenigudu pa wey meumani is ketau zan, piru is minge tulebung edtulung egkagi te ebpekezezaat kandan te kenà egkeuget.

¹⁵Is minge sepian iyan kutè dan is ketigeyunan dan, ne is minge ayu-ayu, iyan ebpekezezaat kandan is kewewezai.

¹⁶Is suhul te etew he metazeng iyan is meupiya wey melugayad he untung, piru silut mulà is egkeragun te lalung he etew.

¹⁷Is etew he ebpezumazuma te minge penurù, ebpekaangken te meupiya wey melugayad he untung, piru is etew he kenà ebpemingeg te minge penurù egketazin.

¹⁸Teruen is etew he id-eles din is kegkepauk din, ne tulebung is etew he pereituk.

¹⁹Is etew he verak melemu ebpekesalà. Piru is uluwanen he etew egketuenan din te ked-egen is dilè din.

²⁰Is minge lalag te metazeng he etew mahal iring te pelata, piru is isip te lalung he etew wazè din pulus.

²¹Is lalag te metazeng he etew ebpekevegey te keupiyaanan diyà te mezakel he minge etew, piru is minge tulebung ebpemematey tenged te kekurangan te kedsavut dan.

²² Ebpekepesepian te etew is kedtuvazi kandin te NENGAZEN, ne kenà heini egkekuwa pinaagi te subra he kebpenigudu.

²³ Is igkelihey te tulebung iyan is kebaal te mezaat, piru is igkelihey te etew he zuen din kedsavut iyan is kebpongubpaan duma is ketau.

²⁴ Iring te is igkeherati te etew he mezaat is menge ulaula zin, ne egkelaus egkehitaavù diyà te kandin, is etew he metazeng, egkekuwa zin is edtinguhaan din.

²⁵ Emun ebpekeuma is menge penggezam te ked-ubpà he iring te vagyu, egkehanew is lalung he etew, piru is etew he metazeng kenà egkewaleng, edhitindeg he melig-en.

²⁶ Iring te sukà he ebpekengingilu te ngipen, wey is evel ebpekepeluhà te mata, ne is pegulen he etew igkererengiti zaan te edsugù kandin.

²⁷ Is kedtahud te NENGAZEN ebpekepelugayad te untung, piru mevavà is untung te lalung he etew.

²⁸ Kelipey is egkeperateng te etew he metazeng, iyan, is ebperetengen te etew he mezaat is menge ulaula zin, ne kenè din egkekuwa.

²⁹ Is kedsunud te menge sugù te NENGAZEN iyan ilian te menge metazeng, iyan, is menge lalung he edsupak kayi ne egkengezeetan mulà.

³⁰ Is menge etew he metazeng, ebpedayun is ked-ubpè dan, iyan, is menge etew he mezaat is menge ulaula zan, ne kenà ebpekepedayun is ked-ubpè dan kayi te tanà.

³¹ Is menge lalag te metazeng he etew ebpekevegey te ketau, iyan, is ebpengegiyen te etew he limbungan ne kenà ebpedayun.

³² Is metazeng, egketuenan din ke hengkey is dait he egkegiyen, iyan, is menge etew he mezaat is menge ulaula, ne winalì dà is egketuenan dan.

11 ¹ Igkepes te NENGAZEN is limbung he paagi te kedtimbang, piru iyan din igkesuat is kenà kedlimbung.

² Is ebpelavew ne egkepeel-elezan sikandin, piru is kenà mepelevawen egkehimu he uluwanen.

³ Is etew he metazeng, egketuenan din ke hengkey is ereg he ebeelan din su hustu man is paagi zin, piru is etew he edlimbung, egkezeetan su kenà hustu is paagi zin.

⁴ Kenà ebplus diyà te kenikew is ketigeyunan emun iyan en kebpatay nu, iyan, is ketazeng mulà, ebpekelibri kenikew te kemetayen.

⁵ Is ketazeng te etew he wazà duen igkesewayi, iyan ebpekepelemu te ked-ubpè din, ne is mezaat he ulaula te etew ne iyan ebpekezezaat kandin.

⁶ Is metazeng he kebpongubpaan te etew iyan hustu he ebpekelibri kandin, piru is mezaat he penganduy te etew he meluiven ne ebpekezezaat kandin.

⁷ Emun ebpatay en is menge etew he lalung, ne egkaawà is perateng dan; is menge penganduy zan egkehimu he wazè dan pulus.

⁸Edlibriyen te Megbevayà te kelised is metazeng he etew, piru kenè din mulà edlibriyen is lalung.

⁹Edezeetan te minge etew he wazà medtuu te Megbevayà is duma zan pinaagi te minge ebpekezezaat he ebpengegiyen dan, iyan, egkelibri mulà is metazeng he minge etew pinaagi te kegkeuluwanen dan.

¹⁰Ed-ugyab te kegkelihey is minge meginged diyà te inged dan emun ed-uswag is minge metazeng he etew; igkelihey zaan te minge meginged dutun emun ebpatay is minge etew he mezaat is minge ulaula.

¹¹Pinaagi te kedtuvazi te metazeng he minge etew ed-uswag is inged, iyan, pinaagi te minge lalag te minge etew he mezaat is minge ulaula, egkezeetan is inged.

¹²Is etew he wazè din utew kedsavut mesudì te zuma zin, iyan, is etew he metau he edsavut, ne kenà mulà mesudì.

¹³Is etew he pereituk, kenà egkeserigan su edtudtulen din is kenà duen ibpetudtul, iyan, is etew he metazeng, egkeserigan mulà su kenè din edtudtulen is kenà dait he edtudtulen.

¹⁴Egkezaag te tebek is nasyun he wazà duen ebpekepenurù ke hengkey is hustu he ed-ul-ulahan, iyan, ebpekezaag mulà is nasyun he mahabet is metau he edsambang ke hengkey is hustu he ed-ul-ulahan.

¹⁵Is etew he ebpesarig te utang te zuma he etew ne menigù en he ebpekendsit, piru is etew he kenà ebpesarig te zuma ebpekelikey te selenditan.

¹⁶Telehuzen is bahi he meupiya is ulaula zin. Piru kenà telehuzen is mevurut he maama su ketigeyunan dà is egkekuwa zin.

Is etew he pegulen egkaayuayu, piru is etew he megied edsepian mulà.

¹⁷Is etew he metinevangen, iring te iyan din edtevangen is keugelingen din, ne is mesipala, iring te iyan din ebpesipelahan is keugelingen din.

¹⁸Is lalung he etew, kunaan din ke meupiya is suhul kandin, iyan, meupiya mulà is suhul te etew he meupiya is minge ulaula zin.

¹⁹Melugayad is untung te etew he metazeng, iyan, is etew he kenà ed-engked he ebaal te mezaat, kemetayen is egkepengkusan din.

²⁰Egkeepesan te NENGAZEN is minge etew he iyan dan ed-isipen is mezaat, iyan, igkelihey zin mulà is minge etew he wazà igkesawey te minge ulaula zan.

²¹Siguradu he edsilutan is minge etew he mezaat is minge ulaula zan, iyan, kenà mulà edsilutan is minge metazeng.

²²Is kekempet te vahi he tulebung, wazà pulus diyà te kandin; iring dà te vulawan he inggalunggalung te vavuy.

²³Meupiya is rimegas te tinguhà te etew he metazeng, piru igkepauk mulà is tinguhà te lalung.

²⁴Duen etew he ibpemegey zin dà is ketigeyunan din, iyan, nasì ed-iseg is kegketigayun din, ne zuen daan utew subra is kegkenugun din te azen din, iyan, nasì egkaawà diyà te kandin is minge azen din.

²⁵Is kelelagan he etew, ed-uswag sikandin, ne is edtavang te zuma zin, edtevang dan sikandin te zuma zin.

²⁶Edrewakan te minge etew is etew he idsekel zin is keuyagan, iyan, ebpenubtuvazan dan mulà is andam he ebelegyà te keuyagan su wey metevangi is duma.

²⁷Is etew he meupiya is tuyù din, meupiya is isip te minge etew ziyà te kandin, iyan, is etew he mezaat is tuyù din, mezaat daan is ed-ul-ulahan te minge etew ziyà te kandin.

²⁸Is etew he edsarig te ketigeyunan din, egkeulug iring te zahun he egkepugpug, piru is metazeng, ed-uswag iring te melambeg he pinemula. ²⁹Is etew he ed-sinamuk diyà te keugelingen din he pemilya, ne wazà egkepupulus din, ne is minge tulebung, egkehimu zà he suluguen te minge metau.

³⁰Is rimegas te minge ulaula te etew he metazeng, igkepetug-iring te kayu he ebpekevegey te untung, ne is ed-ul-ulahan te etew he metau ibpenurù din diyà te minge etew is paagi te hustu he kebpengungubpaan.

³¹Ne zini te kelibutan egkezawat te minge metazeng is bales te meupiya he minge vaal zan, ne lavew pa he ebpekezawat te vales te mezaat he minge vaal zan is minge etew he kenà edtuu te Megbevayà wey minge mekesesalà.

12 ¹Is etew he egkesuat he ibperangka ziyà te kandin is sayep din egkesuat he egkehimu he uluwanen, iyan, is etew he paglung ne egkeepes emun egkegiyen diyà te kandin is minge sayep din.

²Egkehizuwan te NENGZEN is meupiya he etew, iyan, edsilutan din mulà is ed-isip te mezaat.

³Kenà iyan ibmelig-en te etew is mezaat he minge ulaula, piru is etew he metazeng iring te kayu he midtuaneb is dalid din.

⁴Is bahi he egkezeligan tenged te meupiya he minge vaal zin, ne zengeg sikandin te esawa zin, piru is bahi he mekeeled-eled is minge ulaula zin, ne iring sikandin te vaus he midtuvù diyà te peka te esawa zin.

⁵Hustu is ed-is-isipen te etew he metazeng, iyan, limbung mulà is idsambag te etew he mezaat is minge ulaula zin.

⁶Is minge lalag te lalung he etew, igkepetug-iring te etew he ed-ayan su wey mekevunù su pinaagi zutun egketuvù is samuk, ne is minge lalag te etew he metazeng, igkepetug-iring mulà te etew he edlaguy te mid-eyanan su pinaagi zutun egkehusey is egketuvù he samuk.

⁷Is minge etew he lalung edezeetan ne wazè en egkesamà kandan, iyan, is etew he metazeng ebpedayun mulà is kevuwanan din.

⁸Egkezeligan is etew pinaagi te ketau zin, piru is etew he egketultulebung, edsudien sikandin.

⁹Deyzey pa is etew he ed-isipen din he minus is pid-etawan din, he ebpekevegey te suhul te suluguen din, kenà te etew he ed-isipen din he lavew is pid-etawan din, piru edlised su wazè din egkekaan.

¹⁰Is metazeng he etew, ed-eliminahan din is minge uyagen din, piru is ketulanged te etew he mezaat is minge ulaula zin, ebpekezezaat su seligkep dà.

¹¹Is mevasuk, ne layun dekelà is keuyagan din, piru sikan is etew he kenà utew metau he ed-isip ke hengkey is hustu, kenè din egkenugunan is timpu he egkeusik.

¹²Is etew he lalung, iyan din layun egkesuati is kebaal te mezaat, umbe kenà melig-en is kebpekesavuk din, piru is metazeng mulà, melig-en iring te kayu he mezalem is nesenevan te minge zalid din.

¹³Is mezaat he kegkagikagi te mezaat he etew iyan ebpuunan te samuk, iyan, is metazeng he etew ebpekelikey mulà te samuk.

¹⁴Is meupiya he minge lalag wey meupiya he minge ulaula, ne meupiya zaan is rimegas din.

¹⁵Is etew he tulebung, kenà ebpemineg te sambag su kunaan din ke hustu en is paagi zin, iyan, ebpemineg mulà te sambag is etew he uluwanen.

¹⁶Is tulebung he etew, emun ed-insultuwan segugunà egkepauk, iyan, is etew he uluwanen kenè din edsegipaan is ked-insultuwi kandin.

¹⁷Is kenà teruen he tistigus, hustu is ebpengegiyen din diyà te hukmanan, iyan, is tarù he tistigus, tarù is kandin he ebpengegiyen.

¹⁸Is kenà binentayan he kegkagi, iring te lembitan su ebpekepalì te gehinawa, iyan, is minge lalag he mibpurungan is-isipa ne ebpekevey te keupiyaanan.

¹⁹Is minge lalag he tutuu kenà egkaawà te wazà pidtemanana, iyan, is lalag he tarù megaan dà egkahanew.

²⁰Limbung is egketagù diyà te gehinawa te etew he iyan ed-isipen din is kebaal te mezaat, iyan, kelipey mulà is egketagù diyà te gehinawa te etew he ebpen-ahà te melinew he kebpekesavuk.

²¹Wazà ebpekekaid te etew he metazeng, iyan, samuk mulà is egkeperateng te minge etew he mezaat is minge ulaula zan.

²²Egkeepesan te NENGAZEN is teruen, piru igkelipey zin mulà is kenà minge teruen.

²³Kenà ebpehivantug is etew he uluwanen mehitenged te netuenan din, piru is minge tulebung, ibpezalig dan mulà is tinulebung he minge vaal zan.

²⁴Is etew he megied egkehimu he pengulu, iyan, is etew he pegulen, egkehimu zà mulà he uripen.

²⁵Is kegkeipeng ne ebpekevegey te seeng, iyan, is meupiya he lalag, ebpekevegey te kelipey.

²⁶Is metazeng he etew ebpekegiya te emigu zin, piru ebpeketazin mulà is lalung he etew. ²⁷Is pegulen he etew, kenè din egkekuwa is egkesuatan din, iyan, edsepian mulà is etew he megied.

²⁸Emun ebpengungubpaan ka he metazeng, pedayun ka he ed-ubpà wey egkelibri ka te kemetayen.

13 ¹Is anak he uluwanen, ebpezumazuma te kebmensuwa kandin te amey zin, piru is anak he sumpalit, ne kenà ebpemineg he edewayen. ²Is etew he meupiya is kebpengagikagi zin, ne meupiya is ibales kandin, piru is etew he meluiven ne edezeetan. ³Is etew he ebenteyanan din is kebpengagikagi zin, ne iring te iyan din ebentayan is keugelingen din, piru sikan is kenè din ebenteyanan is kebpengagikagi zin, edezeetan din is keugelingen din. ⁴Emun pegulen is sevaha he etew, duen pezem egkesuatan din, ne kenè din egkekuwa heini, piru emun megied sikandin, egkekuwa zin is subra pa te egkesuatan din.

⁵Is etew he metazeng, igkeepes din is kedtarùtarù, iyan, is etew he mezaat is minge ulaula zin, mekeeled-eled mulà is minge lagag din.

⁶Is meupiya he minge ulaula, iyan bantey te minge metazeng, piru is mezaat he minge ulaula, iyan ebpuew te minge mekesesalà.

⁷Duen etew he uvag kun sepian sikandin, iyan, wazè din ketigeyunan. Ne zuen daan uvag kun pubri, iyan, dekelà is ketigeyunan din.

⁸Is sepian egkevelukasan din is untung din, iyan, wazà edhulgà te etew he egkeey-eyuwan.

⁹Is kerayag te minge metazeng ebpurung edsiga, iyan, is sulù te ebpemen-ulaula te mezaat ne egkeevukan mulà.

¹⁰Samuk dà is egketuvù pinaagi te kebpelavew. Ne is etew he metau, ebpesambag sikandin.

¹¹Is selapi he melemu is paagi te kegkekuwaa zuen, megaan dà egkahanew, iyan, ed-uswag mulà is selapi he meregen is paagi te kegkekuwaa zuen.

¹²Is kenà kegkeengkena te etew te penganduy zin ne ebpekezezaat te gehinawa zin, piru is etew he naangken din is penganduy zin ne ebpekeli-en wey ebpekeliyey kandin.

¹³Is etew he kenà ebpezumazuma te ibpenurù, iyan edsugù kandin he merasey, piru is etew he ebpezumazuma te sugù, ebpekehendiyà mulà te keupiyaanan.

¹⁴Is ibpenurù te etew he uluwanen, iring te kedtudà te wahig he ebpekevegey te untung, su pinaagi zutun, egkesenggilahan ta is ebpekepemevavà te umur ta.

¹⁵Edtehuzen is etew he meupiya is ked-isip-isip din. Piru is etew he kenà edtuman te hustu, ne iring sikandin te ed-ikul ziyà te zalan he vetuwen.

¹⁶Is etew he metau he ed-isip-isip ke hendei is hustu etawa kenà, ed-is-isipen din dèpa, ne human din ebeeli heini, piru is lalung mulà kenè din en ed-is-isipen, umbe ibpeehè din iyan is kelelalung din.

¹⁷Is menunudtulà he kenà egkeserigan ebpekevegey te rirù, iyan, is menunudtulà he egkeserigan ebpekevegey mulà te kelinew.

¹⁸Is etew he kenà egkesuat he ebpenuruen, iyan egkepengkusan din is egkepeey-eyuwan wey egkepeel-elezan, iyan, egkezeligan mulà is etew he ebpekeventayan din is idawey kandin.

¹⁹Uteu ta igkelihey emun egkekuwa ta is utew ta egkesuati, iyan, kenà mulà egkesuat he ed-iniyug te mezaat is menge tulebung.

²⁰Is etew he uluwanen layun ebpekiduma te iring din he uluwanen, iyan, ebpekebmeregen mulà is etew he layun ebpekiduma te tulebung.

²¹Ebpekeuma is ebpekezezaat te mekesesalà, piru is menge metazeng ne ebelesan te meupiya.

²²Is ketigeyunan te etew he metazeng ne egkepengevilin te menge apù din, iyan, is azen te mekesesalà, iyan ebpekaangkên duen is menge metazeng.

²³Dekelà pezem he keuyagan is egkekuwa ziyà te tanà te egkengeey-eyuwan, piru kenè dan egkepulusan heini tenged te kenà metazeng is ebeelan te zuma.

²⁴Wazè nu pelengгаа is anak nu emun kenè nu ebmensuwen, wazè nu heini pelengгаа. Emun pelanggè nu sikandin, edtulizen nu is mezaat he betasan din.

²⁵Kenà ebitilen is menge metazeng, iyan, ebitilen mulà is kenà menge metazeng.

14 ¹Is bahi he uluwanen, ebpurangan din is pemilya zin, iyan, is tulebung mulà he vahi edezeetan din is kandin he pemilya.

²Is kedtinazeng, ne paagi te kedtehuza te NENGAZEN, piru is kenà kebpengungubpaan te hustu, ne paagi te kedsudia kandin.

³Is menge ebpengegiyen te tulebung he etew, iyan ebpekezezaat kandin, piru is ebpengegiyen te uluwanen, iyan egkehimu he pengalang din.

⁴Emun wazà ayam he igkeeradu ne wazè daan tagù te budiga su pinaagi te zesen te ayam ebmeluag is terebahu ta ne zekelà is egkeragun ta.

⁵Is kenà teruen he tistigus kenà edlimbung, iyan, is tarù he tistigus, ebpengagi zaan te tarù.

⁶Is etew he sumpalit, kenà egkehimu he uluwanen, iyan, is etew he uluwanen, melemu zà mulà egketau.

⁷Likayi nu is etew he tulebung su kenà ebpekevegey te ketau is menge lalag din.

⁸Is ketau te etew he metau he ed-isip-isip te ed-ul-ulahan din ke hendei is hustu wey kenà, ne iyan ebegey kandin te keuluwanen ke hengkey is ebeelan din, piru is ketutulebungi te menge tulebung, ne ebpekelimbung kandin.

⁹Kenè en ebeliyen te menge tulebung is salè dan, iyan, is menge metazeng he etew, ne meupiya mulà is kebpengungubpaan dan; egkesuatan dan he ebpekepenunuat sikandan te Megbevayà.

¹⁰Iyan ke zà nesayud te utew nu kegkelipey etawa kegkeseeng.

¹¹Edezetan is pemilya te etew he mezaat is menge ulaula zin, piru ipeuswag is pemilya te ebpengungubpaan te hustu.

¹²Duen dalan he kunaan te etew ke iyan hustu he zalan, iyan, is egkepengkusan dutun ne iyan is kemetayen.

¹³Egkehimu he id-eles ta is mezaat he gehinawa ta pinaagi te ked-engit, iyan, emun ebpekepasad ka he ed-engit mesakit gihapun is gehinawa nu.

¹⁴Is etew, ne egkezawat din is bales te mibeelan din, meupiya etawa mezaat.

¹⁵Is etew he wazè din utew hanew, edtuu te minsan hengkey zà duen; is etew he metau, ne ed-is-isipen din ke hendei is meupiya etawa mezaat ne ebentayan din is kedlangkad din.

¹⁶Is etew he uluwanen, ne ed-empingan din is keugelingen din ne edlikey sikandin te samuk, piru is tulebung, melemu egkepauk ne ebeyveyanan din is hustu.

¹⁷Is etew he melemu egkepauk ebpekevaal te tinulebung. Is etew he metau te kebpekelimbung din, ne egkukuntedahan te menge zuma zin.

¹⁸Is etew he wazè din utew pereg, egkezawat din is rimegas te ketutulebungi zin, ne is etew he layun din ebpekeventayi is ed-ul-ulahan din, egkevantug sikandin tenged te ketau zin.

¹⁹Ebpekezunghuy wey ebpekepehizuhizu ziyà te menge metazeng is menge etew he mezaat is menge ulaula zan.

²⁰Is etew he egkeey-eyuwan, minsan is siringan din, ne kenà edsegsegipà kandin, iyan, mahabet mulà is emigu te sepian he etew.

²¹Is etew he edsudì te zuma zin, ne ebpekesalà, iyan, utew zeyzey is etew he metinevangan te kinahanglan he edtevanglan.

²²Is etew he ebpelanu te mezaat, ebpekevaal te sayep, iyan, is etew he meupiya is ebpelenuwen din, ebmahalen wey ebpezumdumahan sikandin te zuma he menge etew.

²³Emun edterebahu ki ne layun ta egkekuwa is rimegas te kedhagù ta, iyan, emun bà ki zà ebembentaan ne iyan dà egkepengkusan ta is kegkeayuayu.

²⁴Is menge uluwanen, ne iyan suhul zan is dekelà he ketigeyunan dan, iyan, is tinulebung he vaal te menge tulebung, ne iyan dà rimegas din is ketutulebungi.

²⁵Is kenà teruen he tistigus, ebpekelibri te menge etew wey zan kenà mehimetayi, iyan, is tarù he tistigus ne utew limbungan.

²⁶Is kedtehuza te NENGAZEN, ne iyan ebpekevegey te kelig-en wey kenà kegkekeizi te etew wey te menge anak din.

²⁷Is kedtehuza te NENGAZEN iring te kedtudà te wahig he ebpekevegey te untung, su pinaagi zutun egkelikayan ta is ebpekepevavà te umur ta.

²⁸Is keggkemekegegehèm te hadì ne pinaagi te kahabet te minge sakup din; emun wazè din minge sakup ne wazè din daan gehem.

²⁹Is etew he uluwanen, ne mepelevayen sikandin, ne egketuusan ta is tulebung su melemu sikandin egkepauk.

³⁰Is melinew he isip, ibmeupiya te lawa, iyan, is kegkesina, iring te zaru he kansir su ebpekezezaat.

³¹Is kedèdaaga te minge pubri, paagi te kedsupaka te Megbevayà, iyan, is kedtevangi te etew he kinahanglan he edtevangangan, paagi te kebentuga te Megbevayà.

³²Edezeetan te Megbevayà is minge mekesesalà tenged te mezat he ulaula zan, piru ebpengelangan din is metazeng minsan ke ebpatay, ne zuen din mulà egkeeputan.

³³Ke vâ dà etew is ketau ne midlipezeng sikandin diyà te isip te etew he pereudseb, ne ebpekilala sikandin minsan diyà te minge tulebung.

³⁴Emun metazeng is minge meginged egkevantug is inged, iyan, is salà mulà ebpekevegey te keelezan.

³⁵Igkelipey te hadì is sinerigan din he uluwanen, iyan egkeepesan din mulà is sinerigan din he mekeeled-eled is baal zin.

15 ¹Is menayù he kedtavak, ebpekepevehew te pauk, iyan, is hangger he kedtavak, ebpekepeiseg te pauk.

²Emun egkezineg te minge etew is minge lalag te uluwanen, egkesuat dan he mebmetau, piru is edlelagen te minge tulebung pudu zà tinulebung.

³Egkaahà te NENGAZEN is minsan hendei. Egkeehè din is ed-ul-ulahan te minsan hentei, metazeng etawa lalung.

⁴Is lalag he menayù, ebpekepayùpayù te gehinawa, iyan, is minge lalag he ebpekelimbung, ebpekaawà te kezasig.

⁵Is taleng he etew ne kenè din ebpezumdumanan is penurù te amey zin, piru is uluwanen mulà, ebpemineg te ibpenurù kandin.

⁶Duen dekelà he ketigeyunan te minge metazeng diyà te valey zan. Ne is egketigeyunan te minge lalung, ebpekevegey kandan te samuk.

⁷Edseysayen te minge uluwanen is ketau; kenà heini egkeveelan te minge tulebung.

⁸Egkeepesan te NENGAZEN is pemuhat te minge lalung, piru igkesuat din mulà is minge kebpengemuyù te minge metazeng.

⁹Egkeepesan te NENGAZEN is etew he ed-ulaula te mezaat, piru ebmahalen din mulà is ebpeninguhà he mekeulaula te metazeng.

¹⁰Uteu merasey is ibmansu te etew he ed-engked he ed-ulaula te meupiya, ne is kenà ebpezawey, iyan egkepengkusan din is kemetayen.

¹¹Kenà ebpekeeles diyà te NENGAZEN is egketagu diyà te isip wey gehinawa te minsan hentei su minsan is egkengeulaula ziyà te iveyaan, ne netuenan din.

¹²Is etew he sumpalit, kenà egkesuat he ebpenuruen ne kenà sikandin ebpekisambag diyà te metau.

¹³Emun duen kelipey ziyà te gehinawa te etew ne ebpekegemen sikandin, iyan, emun mesakit is gehinawa zin ebmerembunut is kebuvuked din.

¹⁴Is etew he pereudseb, ebpenigudu wey meumani is netuenan din, iyan, is tulebung, kenè en mulà ebpeninguhà he mebmetau sikandin.

¹⁵Is menge pubri layun edlised, piru emun egkekuntintu zan ne layun dan egkelipey.

¹⁶Deyzey pa is etew he zeisey zà is ketigeyunan din, iyan, edtahud sikandin te NENGAZEN kenà is etew he zekelà is ketigeyunan din, iyan, layun egkesemuki.

¹⁷Deyzey pa is menge etew he lumbey zà is sezè dan, iyan, egiginegawè dan, kenà is menge etew he usa is sezè dan, iyan, ebpekunkuntedehè dan.

¹⁸Is etew he melemu egkepauk, egkehimu he hinungdan te kesevaan, iyan, is etew he mepelevayan, ebpekehusey te egkesavà.

¹⁹Layun edlised is etew he tepulan, iyan, is etew he metandang is ulaula zin, kenà mulà edlised.

²⁰Is anak he metau, igkelipey te amey zin, iyan, is anak he tulebung, edsaweyen din is iney zin.

²¹Is etew he kenà meudseb, igkelipey zin is ketutulebungi zin, iyan, is etew he meudseb, layun hustu is ed-ul-ulahan din.

²²Egkehimu he kenè ta egkekuwa is ebpelenuwan ta te egkuwa emun wazà ebpekesambag kenita te meupiya he paagi, iyan, emun mahabet is ebpekesambag kenita ne egkekuwa ta.

²³Igkelipey te etew emun egkeisip din is hustu he kegkegiya te egkegiyen din, lavew en ke egkekagi zin haazà diyà te hustu he timpu te kegkegiya zuen.

²⁴Is etew he metau, iyan ed-ikulen din is dalan pehendiyà te untung ne kenà iyan is dalan pehendiyà te kemetayen.

²⁵Edrundusen te NENGAZEN is baley te etew he mepelevawen, iyan, edtipigan din mulà is menge azen te valu.

²⁶Igkeepes te NENGAZEN is ked-isip-isip te lalung, piru igkesuat din mulà is ked-isip-isip te metazeng he etew.

²⁷Is etew he legezen, egkesemukan is pemilya zin tenged kandin, ne is etew he kenà ebpesipsip, edlugeyazan te umur.

²⁸Is etew he metazeng, edtimimbangan din edhuna a ziyà te isip din ke hengkey is idtavak din, iyan, iburaswang mulà te etew he lalung is mezaat he menge lalag.

²⁹Meziyù is NENGAZEN te menge lalung, piru uvey sikandin te menge metazeng, su ebpeminegen din is kebpengemuyù dan.

³⁰Ebpekelipey is kebpenggemengemen, ne is meupiyè he tudtul ebpekezasig.

³¹Is etew he ebpeminegen din wey edewaten din is sawey kandin su wey mebmelugayad is untung din, ne ebpekaamur sikandin te minge metau.

³²Is etew he kenè din idtetenged is penurù kandin pinaagi te kedsewaya kandin, iring te iyan dà sikandin mezesen he edsudi te keugelingen din. Iyan, emun ebpemineg sikandin te penurù, ebmetau sikandin.

³³Is kedtehuza te NENGAZEN iyan ebpekepenurù kenita wey ki mebmetau, ne kenè ki egkezeligan emun ebpelavew ki.

16 ¹Is etew, edhimu te minge pelanu, piru is NENGAZEN, iyan ebayàbayà te langun.

²Is langun he ed-ul-ulahan te etew, midtuuwan din he hustu, piru edsusiyen te NENGAZEN is tuyù te uman sevaha.

³Isarig nu ziyà te NENGAZEN is minsan hengkey he ed-ul-ulahan nu, ne egketuman nu is minge pelanu nu.

⁴Is minsan hengkey he ebeelan te NENGAZEN ne zuen din tuyù dutun, ne netuenan din ke keenu zin edtepusa, ne is imbanglis diyà te lalung he minge etew iyan is kezeetan.

⁵Egkeepsan te NENGAZEN is minge mepelevawen, ne siguradu edsilutan din sikandan.

⁶Emun mahal ta is NENGAZEN he metinumanen, ebpeseyluwen din is minge salè ta. Emun edtehuzen ta sikandin, egkelikayan ta is mezaat he egkeulaula.

⁷Emun igkesuat te NENGAZEN is minge ulaula ta, edhimuwen din he meemigu ta is minge kuntada ta.

⁸Deyzey pa is deisey he ketigeyunan he meupiya he paagi is kegketigeyuni zuen, kenà is dekelà he ketigeyunan he netigeyunan pinaagi te limbung.

⁹Pinaagi te isip te etew edhimuwen din is pelanu zin piru iyan egiya kandin is NENGAZEN.

¹⁰Emun edhukum is hadi he egiyahan te Megbevayà, layun hustu is kukuman din.

¹¹Kenà igkesuat te NENGAZEN emun edlimbung ki is ebpetigayun.

¹²Igkeepes te minge hadi is mezaat he vaal su iyan man ebpekellig-en te ginhedian dan is ketazeng.

¹³Ebpekepenunuat te minge hadi is etew he kenà teruen, ne zekelà is kedtahud dan kandin.

¹⁴Dekelà is kegehém te hadi umbe emun egkepauk sikandin egkehimu he edhimetayan din is egkepeukan din, ne iyan ebpekepayùpayù kandin is etew he metau.

¹⁵Emun nekepenunuat te hadi is etew ne kenè din sikandin edhimetayan; ibpeehè din kandin is keupiya zin he iring te uzan he ebpekepetuvù te minge pinemula.

¹⁶Meupiya pa he egkaangken is ketau wey kedsavut kenà is bulawan wey pelata.

¹⁷Is etew he metandang is minge ulaula zin edlikey te mezaat, ne is ebentayan din is keugelingen din ebpekelikey te kezeetan.

¹⁸Is kebpelavew wey kegkemesinupaken, edrimegas te kezeetan.

¹⁹Deyzey pa is kenà kebpelavew wey kegkeey-eyuwi kenà is kebpelavew wey kebpekaangken te minge azen pinaagi te ked-agew.

²⁰Is etew he ebpekeventayan din is penurù, ed-uswag sikandin, ne utew zeyzey is etew he edsarig te NENGAZEN.

²¹Is etew he uluwanen, egkekilala he metau he edsavut, ne emun metau he edlalag ne ebpekeistudyu is duma ziyà te kandin.

²²Is kegkesevuta te hustu, iyan ked-isipa zuen te minge pereudseb is iring te tudà te wahig he ebpekevegey te untung su ebpekepelugayad te untung te etew, iyan, is tinulebung he minge vaal, iyan igkesiluti te minge tulebung.

²³Is uluwanen he etew, edhuna ebpurung ed-isip-isip ne human egkagi, umbe utew egkesuati te ebpemineg is ibpenurù din.

²⁴Is minge lalag he meupiya he ebpeminegen, ne iring te teneb is kegedgezama ta zuen diyà te gehinawa ta ne ebpekevawì kenita.

²⁵Duen dalan he kunaan te etew ke meupiya he ed-ikulen, iyan, diyè bes ebpekepevayà te kemetayan.

²⁶Is edsuhulan, edterebahu su wey mevewii is kegkevital zin.

²⁷Is engey he etew, iyan pelanu zin is ked-ulaula te mezaat, ne is minge lalag din ebpeketutung iring te hapuy.

²⁸Is etew he mezaat is kebpemèbè din, ebpeketuvù te samuk wey egkehimu he hinungdan te kebpekegkuntedaha te teleemigu.

²⁹Is etew he mesipala, egkelimbungan din is duma zin pinaagi te pesarig din, ne egkeuwit din diyà te kezeetan.

³⁰Is ebpurung dà ebpengpengendat, lagmit mezaat is ed-isipen din, ne is ebpurung dà ebpenggemen-gemen, lagmit daan mezaat is tuyù din.

³¹Uteu meupiya emun egkembuwayan ki taman te ked-indelawi te vulvul ta, ne ziyè heeyan egkeulaula te etew he metazeng.

³²Deyzey pa is etew he mepelevayen, kenà is etew he vegani; deyzey pa is etew he ed-egenen din is pauk din, kenà is ebihag te sengeingezan.

³³Ebarà is etew su wey zin metueni is dait he ed-ul-ulahan din piru iyan is NENGAZEN ebpuunan te minsan hengkey he penurù he zait he ed-ul-ulahan.

17 ¹Meupiya pa is pemilya he usahay vehew zà is egkeenen dan, iyan, melinew is kedezepitè dan, kenà is pemilya he layun dà meupiya is sezè dan, iyan, ebpekunkuntedahà.

²Is uluwanen he suluguen, ne ebpekemandù te taleng he anak te egalen din, ne ebegayan sikandin te egkepengevilin duma te zuma pa he minge anak te egalen din.

³Is bulawan wey pelata, egezaman pinaagi te hapuy, ne egezaman daan te NENGAZEN is gehinawa te etew.

⁴Is lalung, egkesuat he ebpemineg te mezaat he minge lalag, ne is teruen, egkesuat he ebpemineg te tarù.

⁵Is etew he ed-un-undahan din is minge pubri, iyan din egkesudì is Megbevayà su iyan man midlimbag kandan, ne is igkesuat din is kegehitevua te mezaat diyà te sengeetew, siguradu edsilutan sikandin.

⁶Dengeg te megurang is minge apù din ne zengeg daan te minge vatà is ginikanan dan.

⁷Wazà igkepegalbu te tulebung ne kenè dait he edtarùtarù is pengulu.

⁸Is etew he edsipsip, kunaan din ke iring te kegekeselemengkuru is kedsipsip su pinaagi zutun, egkehimu kun minsan is kenà pezem egkehimu.

⁹Is etew he ebpeseyluwen din is ebpekesalà diyà te kandin, igkepenurù din pinaagi zutun he iyan hustu he ed-ul-olahan is kegiginegawa, ne is ed-uman egkeyungkat dutun te sayep ne ebpekebulang te utew teleemigu.

¹⁰Is etew he meudseb, kesevaha zà edsewaya ne egkepenurù en, iyan, is tulebung, minsan penletiguwa pa ne kenà egkepenurù.

¹¹Is lalung he etew, edsukul te gubirnu, ne zuen daan edsuguen wey mekaasdang kandin.

¹²Piligru pa is kebpekesinugung te engey kenà is kebpekesinugung te bir he ed-uraingen tenged te vegu pa he midawi te sengelelanggam is minge anak din.

¹³Emun mezaat is ibales ta te meupiya ne is mezaat kenà egkaawà diyà te valey ta.

¹⁴Is puunà te kesevaan, ne iring te zeisey he vudsi ziyà te teleguey te wahig; umbe edsengsengen heini te wazè pa medekelà.

¹⁵Is kedlibriya te nekesalà wey is kedsiluti te wazà mekesalà, ne pudu kenà igkesuat te NENGAZEN.

¹⁶Wazà pulus te selapì he egkegastu tenged te kebpetunghaa te tulebung su wazè din man tinguhà he mebmetau sikandin.

¹⁷Is elukuy nu, ne egkehizuwan kezin te langun he timpu, wey iyan ketuyuan ke maan is duen nu perinti, para zuen edtavang kenikew te timpu te kelised.

¹⁸Is etew he kenà metau he ed-isip ke hengkey is hustu, ne segugunè din ebpeseriga is beleyazan te zuma zin.

¹⁹Is etew he zekelà diyà te gehinawa zin is samuk, ne zekelà diyà te gehinawa zin is salà; ne is etew he lalung ne ebpen-ahà te kegekzeeti zin.

²⁰Kenà ed-uswag is etew he layun mezaat is ed-isipen din, ne ebpekaagbur ziyà te kesamuk is etew he layun mezaat is ebpengegiyen din.

²¹Emun engey is anak ta egkevegayan ki te seeng, ne wazè ta kelipey.
²²Emun layun duen kelipey he egketagù diyà te gehina ta, ebmeupiya is kedlelawa ta, iyan, emun layun dà seeng is egketagù diyà te gehinawa ta, egkezeetan is kedlelawa ta.

²³Is lalung he etew, edewaten din is idsipsip diyà te kandin su para kenà metuman is hustu he kukuman.

²⁴Is etew he meudseb, egketuanan din ke hengkey is dait he ebeelan din, iyan, is tulebung, minsan hengkey zà duen is ebeelan din.

²⁵Is tulebung he anak, egkevegayan din te seeng is amey zin ne igkeperugur zin is iney zin.

²⁶Kenà meupiya is kebpigada te etew he wazà mekesalà wey is kebugala te minge upisyal tenged te kedtinazeng dan.

²⁷Is etew he uluwanen, emun egkagi, ebpekeventayan din is minge lalag din su wey kenà mekekagi te kenè hustu, ne is meudseb he etew mevented sikandin.

²⁸Minsan is tulebung kunaan ta ke uluwanen wey meudseb emun ebperpereremek dà sikandin.

18 ¹Is etew he kenà ebpekid-emigu ne iyan dà ed-isipen din is kandin he keupiyaanan, ne edsupaken din is hustu he ed-isipen te zuma.

²Is tulebung he etew ne wazè din isipa is kebpeiseg te kedsavut din; iyan egkesuatan din he ibpahayag is kandin he egkengeisip umbe layun din ibpezineg.

³Is kebaal te mezaat wey mekeeled-eled he vaal ne iyan ebpekevegey te keelezan.

⁴Is minge lalag te uluwanen he etew ne ebpekevegey te ketau te zuma; iring te edtudà he wahig he ziyà ebpuun te mezalem he serebseb he kenà egkemezahan.

⁵Kenà meupiya is kedapig te selaan wey is kenà kebegey te kevenar ziyà te ebpekevenar.

⁶Is minge lalag te tulebung he etew, iyan puunà te tebek wey iyan igkesekiti zin.

⁷Is kegkagikagi te tulebung he etew ne iyan ebpekezezaat kandin.

⁸Is ituk, iring te metaam he keenen he egenahan ki he ed-eveleng duen.

⁹Is etew he igkepeguli zin is terebahu zin, ne iring te etew he ebpendezaat.

¹⁰Is NENGAZEN, iring te melig-en he turi he iyan egkeeputan te minge metazeng su wey zan kenà mekeizi.

¹¹Is ketigeyunan te minge sepian, midtuuwan dan he iyan kutè dan he iring te metikang he verengbeng he nekeliguy te inged.

¹²Is kebpelavew te etew ebpekezezaat kandin, iyan, edeligen mulà is etew he kenà mepelevawen.

¹³Taleng wey ebpeeled-eled is etew he tekew en edtavak te wazè din peminega.

¹⁴Is kelipey he egketagù diyà te gehinawa te etew, iyan ibpekesustinir zin emun egkezeruan, iyan, emun seeng is egketagù diyà te gehinawa zin ne kenà sikandin ebpekesustinir.

¹⁵Is etew he uluwanen wey zuen din kedsavut, egkesuat he meumani pa is netuenan din.

¹⁶Melemu is kebpekidhinguma ta te dungganen he etew emun ed-uwit ki te ibegey ta kandin.

¹⁷Emun diyà te husayen, is egkehuna he egkagi, henduen be te iyan en ebpekevenar, iyan, wey ebpekelepew is hustu emun ebpekedtevakè en haazà is dezuwa he edhusayen.

¹⁸Is kedripa ebpeketavang te kesamuk, ebpeketavang daan te kedhusey te kasu te zezuwa he gemhanan he etew.

¹⁹Is telesuled he ebpekedsilagà utew meregen he ibped-uliey te meupiya he gehinawa. Meregen pa heini he ebeelan kenà is kedseled te miberengbeng he inged.

Iring ded keregen te kedrundus te trangka te gemawan te turugan, meregen he edhusayen is dezuwa he telesuled. ²⁰Iyan ke zed ebplus te menge meupiya he rimegas te menge lalag nu.

²¹Is kedlalag, dezuwa is rimegas din, kedlalag he ebpekelibri wey kedlalag he ebpekekaid. Umbe is berèbaan egkezawat din is rimegas te menge egkegiyen din.

²²Emun ebpekesawa is etew ne meupiya heeyan, ne tuus heeyan he midtuvazan sikandin te NENGAZEN.

²³Is pubri, edhangyù diyà te sepian he ikheziku sikandin, ne is sepian, singka mulà is kandin he idtavak.

²⁴Duen kebpeemiguwà he kenà egkeuget, iyan, duen daan kebpeemiguwà he edhuna pa te kedtelesuled.

19 ¹Meupiya pa is egkeey-eyuwan he wazà igkesawaye te menge vaal zin kenà is tulebung he mezaat is kebpechè din.

²Kenà meupiya emun tekew ki en egkeleglegetayi te wazè ta metueni is ked-ul-ula zuen wey is egkehimu he rimegas din. Kenà meupiya is kedegdegusu su kela ke mesayep ki.

³Duen menge etew he edezeeten dan is keugelingen dan tenged te kedtinulebung dan, ne iyan ebetulan dan is NENGAZEN.

⁴Tenged te kesepian te etew egkehimu he mahabet is menge emigu zin, ne tenged daan te kegkeey-eyuwi te etew, ed-engkezan sikandin te menge emigu zin.

⁵Edsilutan is teruen he tistigus, ne kenà ebpekegawas te silut is minsan hentei he edtarùtarù.

⁶Mahabet is edhimu te paagi wey zin mepenunuat is etew he lavew is pid-etawan din, ne emun duen etew he ebpekevegey te menge

keupiyaanan ne mahabet is egkagi he emigu zin haazà is nekevegey te menge keupiyaanan.

⁷Is etew he pubri, kenà idtetepian te menge kezuzumahi zin, iyan pe be medsegipà kandin is menge emigu zin dà. Emun ebpetavang ka kandan ne ed-eles dan.

⁸Is kebpenigudu te etew su wey mehimu he uluwanen, ne tuus he igkeseeng din is keugelingen din, ne heini he etew ed-uswag.

⁹Edsilutan is teruen he tistigus, ne is minsan hentei he ebpengagi te tarù ne egkezeetan.

¹⁰Kenà dait is tulebung he etew he ebpengungubpaan he zekelà is ketigeyunan din, ne tuwas pa he kenà dait is uripen he ebayàbayà te menge edumala.

¹¹Tenged te ketau te etew, egkehimu sikandin he mepelevayen. Ne igkelipey zin is kebpesaylu zin te nekesalà diyà te kandin.

¹²Emun egkepauk is hadi ne iring haazà te edhiniger he erimaung, iyan, is tavang din igkepetug-iring daan te zehemug he ebpekepetuvù te pinemula.

¹³Is tulebung he anak, ebpekezezaat te amey zin, ne is bahi he peretebek te esawa zin, ne iring te edtigisan he atep.

¹⁴Is baley wey zuma pa he menge azen, egkepengevilin diyà te ginikanan, iyan, NENGAZEN mulà is ebpekevegey te uluwanen he esawa.

¹⁵Emun ebpepepegul ka wey edtulung ke zà edlipezeg ne siguradu ebitilen ka.

¹⁶Is kebpezumazuma te etew te menge sugù te Megbevayà, iyan egkehimu he ibmelugayad te ked-ubpè din, piru is kenà edtuman ne megaan dà egkeumuri.

¹⁷Emun ebegey ki ziyà te menge pubri, ne iring te impesambey nu is NENGAZEN, su iyan is NENGAZEN ebayad kenikew.

¹⁸Mensuwa nu is menge anak nu zutun te zuen pa timpu. Emun kenè nu sikandan ebmensuwen, iring te mid-ugup ka he edhimatey kandan.

¹⁹Belegaza nu is etew he uuringeren te ked-etuvang te neveelan din, su emun ed-ugupan nu sikandin, ne egkelayam ne edsublien din is mibeelan din.

²⁰Peminega nu is idsambag kenikew ne zewata nu is ibpenurù kenikew ne emun egkeuget egkehimu ka he uluwanen.

²¹Mahabet is pelanu te etew piru iyan gihapun egkeulaula is egkesuatan te NENGAZEN.

²²Iyan egkesuatan te etew is; kenà sikandin engkezi te ebmalal. Deyzey pa is egkeey-eyuwan kenà is teruen.

²³Is etew he edtahud te NENGAZEN, edlugeyazan te untung, melipayen wey ebpekelikey te kesamuk.

²⁴Duen menge etew he utew tepulan minsan is keenen ne kenè din pa igkesungit. ²⁵Kinahanglan he edsilutan is menge sumpalit para is iring dan he kenà memetau ne egkehimu sikandan he uluwanen. Is uluwanen he etew ne ed-iseg pa is kedsavut din emun edewayen sikandin.

²⁶Mekeeled eled wey ebpesudisudì he anak is edsukul te amey zin wey edsegseg te iney zin.

²⁷Mama, emun kenè nu ebpeminegen is menge penurù ku kenikew, ne idselikwey nu is menge penurù he ebpekevegey te ketau.

²⁸Is teruen he tistigus, edsumpeliten din is hustu he ketezengan, wey is menge etew he lalung, iyan egkesuatan dan is kelelalung.

²⁹Ebmultahan is etew he sumpalit ne ebugelen is egkeengey-engey.

20 ¹Is subra he ked-inum te vinu he ebpekelangut, iyan ibmesamuk te etew. Is etew he lelenguten kenà egkehimu he uluwanen.

²Emun egkepauk is hadì henduen be te edhiniger he erimaung. Umbe, emun ebaal ka te igkepauk din, ne edhimetayan ke zin.

³Egkezeligan is etew he edlikey te samuk; is tulebung he etew egkesuat te samuk.

⁴Is tepulan he ed-eradu emun timpu te kebpemula, wazè din egkekuwa emun timpu te tiragun.

⁵Is egketagù diyà te isip te etew, iring te wahig he mezalem, piru emun uluwanen ka, egketegkad nu heini.

⁶Mahabet he menge etew is egkagi he metau sikandan, iyan, tutuu ve he zuen kandan egkeserigan?

⁷Is etew he metazeng kenà egkesewayan is menge ulaula zin. Deyzey is menge anak te etew he metazeng su ketazeng is egkelingehè dan.

⁸Emun edhukum is hadì, ebpurungan din edsusiya ke hengkey is mezaat he mid-ulaula zutun te edhukuman din.

⁹Wazà minsan hentei he ebpekekagi he wazà mezaat diyà te gehinawa zin; ne wazè din salà.

¹⁰Is kedlimbung pinaagi te timbangan wey is kedlimbung pinaagi te sukud, ne pudu igkeepes te NENGAZEN.

¹¹Egketuenan ta is betasan te minsan menguhed pa he etew su egkeehè ta ziyà te menge vaal zin, ke metazeng be sikandin etawa kenà.

¹²Midhimu te NENGAZEN is telinga ta su wey ki mekezineg, wey midhimu zin is mata ta su wey ki mekaahà.

¹³Emun edtulung ke zà edlipezeng, ne ebtilen ka, piru ke ed-enuw ka ne edterebahu, ne zekelà is egkekaan nu.

¹⁴Edsewayen te kumpredur is ibelegyà su para mekehangyù sikandin. Piru emun egkekumpra zin en, ne kenè din en maan edsudien, kekenà ibpenhambug din pa.

¹⁵Mahabet he menge vulawan wey mahalen he menge vatu, piru mezelang dà is etew he egkezumahan te ketau is kegkagi zin.

¹⁶Emun mibpesarig is sevaha he etew he iyan ebayad diyà te kenikew te utang te etew he kenè din kilala, siguruwa nu he zuen din igkegerentiya, minsan bisti zin, para siguradu he mekevayad sikandin.

¹⁷Is keenen he egkekuwa te etew pinaagi te limbung ne meupiya is kegekèkèena zin dutun, iyan, emun edhingungunà haazà henduen dà te pantad diyà te vèbè din.

¹⁸Emun duen ebpelenuwen nu, kinahanglan he ebpekisambag ka ziyà te zuma. Kenè ka hendiyà te tebek emun wazè ka mebpesambag diyà te zuma.

¹⁹Likayi niw is etew he verèbaan su ebpenudtulen din is id-iinelesà pezem.

²⁰Is ebpenrawak te ginikanan din, ne iring sikandin te sulù he egkeevukan su edhimetayan sikandin.

²¹Is kevilin he edseyuwan nu egkuwaa te kenè pa hustu he timpu, ne kenà ebplus diyà te kenikew te huziyan he timpu.

²²Kenè ka vales. Sarig ke zà te, NENGAZEN, ne edtevangangan ke zin.

²³Egkeepesan te NENGAZEN is mge ebpemenlimbung pinaagi te timbangan. Kenà heeyan meupiya he vaal.

²⁴Iyan ebayàbayà is NENGAZEN te untung ta, umbe kenè ta egketueanan ke hengkey is egkeulaula kenita.

²⁵Ebpekezezaat is kegkemegègaanen te kebpenangdù he ibpemuhat nu is sevaha he azen diyà te NENGAZEN. Kinahanglan he purung ka isip-isip ne human ka penangdù.

²⁶Emun edhukum is hadi he uluwanen, ne edtegtagaman din he metueni zin ke hentei is nekevaal te sayep, ne edsilutan din heini.

²⁷Is isip ta ne egamiten te NENGAZEN wey mereyagi is untung ta, ne pinaagi kayi egkesusi ta is keugelingen ta.

²⁸Emun hihizuwen wey metinumanen is sevaha he hadi, ne wazà ebpekezezaat kandin ne ebpedayun is kedhadì din.

²⁹Is igkezeligi te menge vetan-en he maama iyan is desen dan, ne iyan igkeventuga te menge megurang is kegugurangi zan.

³⁰Is kedsilut te mekesesalà iyan ebpeketavang kandin su wey inyugi zin is mezaat.

21 ¹Is isip te menge hadi ne iring te wahig he iyan ebayàbayà is NENGAZEN te kedtudè din. Iyan ebayàbayà kayi sikandin sumalà te egkesuatan din.

²Minsan pa ke iyan egkeisip te etew is utew hustu is langun he menge ulaula zin, iyan hustu is hukum te NENGAZEN kandin.

³Lavew pa he igkesuat te NENGAZEN is ked-ulaula te etew te meupiya wey metazeng kenà is kebpmuhat din te menge ibpemuhat.

⁴Salà is ked-undaunda wey kebmepelevawen. Egketuusan nu is menge lalung he menge etew pinaagi kayi he ulaula.

⁵Emun ebpurung ka ebpelanu ne ebpekegied ka, ne ed-uswag ka. Piru ke emegègaanen ka, ne kenè en ebperis he egkeayuayu ka.

⁶Is ketigeyunan he egkekuwa pinaagi te limbung, megaan dà egkehanew wey ebpekepevavà daan te umur.

7Pinaagi te kebebagnosis te etew he lalong, egketipu sikandin su kenè man sikandin egkesuat he ed-ulaula te hustu.

8Kenà metandang is betasan te mekesesalà, ne metandang mulà is ulaula te kenà mekesesalà.

9Deyzey pa is kedsivey kenà is kebpekid-amur te esawa he peretebek.

10Is menge lalong he etew, utew zekelà is suat dan te ked-ulaula te mezaat; ne wazè dan hizu te zuma zan.

11Emun edsilutan is menge sumpalit, pinaagi zutun egkepenurù is iring dan he wazà kedsavut ne egkehimu he uluwanen. Is uluwanen he etew, ed-iseg pa is ketau zin emun egkepenurù sikandin.

12Is Megbevayà he metazeng netuenan din is menge vaal te menge etew he lalong, ne edsilutan din sikandan.

13Emun kenè ta idtetepian is egkengeayuayu he ebpekitavang kenita, ne kenè ki zaan idtetepian emun iyan ki ebpekitavang.

14Emun ebegayan nu te gasa he wazà metueni te zuma haazà is egkepauk kenikew, ne egkeawà is rerangit din.

15Emun ed-ikulen is hustu he kukuman, egkelipey is menge metazeng, iyan, egkengeheratan mulà is menge lalong.

16Kemetayen is egkepengkusan te etew he edlikayan din is kegketau.

17Is etew he iyan dekelà diyà te gehinawa zin is kedlipeylipey wey kebpengemuran ne egkepubri, ne kenè en edsepiyan, kekenà, egkeey-eyuwan.

18Edsilutan is menge lalong wey is meluiven su wey melibri is menge metazeng.

19Deyzey pa is kedsivey ked-ubpà diyà te sibsivayan, kenà is kebpekid-amur te peretebek he esawa.

20Is uluwanen he etew ne edtegana para te huziyan he timpu, piru is tulebung he etew ebpetakè en mulà te kegastu.

21Is etew he egkesuat he meupiya is ked-ubpè din wey metazeng, ebmelugayad is untung din, wey ebmezeegen, ne egkezeligan sikandin.

22Is peremandar he metau te paagi ebpekaagew te inged he mezakel is menge sundaru zuen, ne ebpekerundus heini te menge verengbeng he edserigan dutun te menge sundaru.

23Is etew he ebpekeventayan din is kebpengagikagi zin, ebpekelikey te samuk.

24Is hembugiru wey mepelevawen he etew, ne egkekilala ta sikandin su masudì sikandin, wey utew mepedeligen.

25Is tepulan, egkehimu he iyan ibpatey zin is kegkeseeng din tenged te kenè din egkekuwa is edtinguhaan din; kenè din egkekuwa su kenè man sikandin edterebahu.

26Is tepulan he etew ne egkesuat layun he ebpekekuwa, piru is metazeng he etew ebegey he wazà kegkenugun.

²⁷Kenà igkesuat te NENGAZEN is ibpemuhat te minge lalung, lavew en ke mezaat is tuyù dan te ked-ul-ulaha zan dutun.

²⁸Is teruen he tistigus ne kenè en ibpekagi, piru is tistigus he tutuu is egkegiyen din ne iyan ibpelaus ibpelalag.

²⁹Is etew he lalung, ne kenè din igkeseeng is ed-ulaula din, piru is metazeng mulà, ebpurungan din ed-isipa is ed-ul-ulahan din.

³⁰Wazà edlampus he ketau, kedsavut, etawa sambag he igkuntra te NENGAZEN.

³¹Minsan andam en is minge kudà he egemiten te kebpekidtebek, iyan, ketau zà te NENGAZEN is kebpekezaag.

22 ¹Is meupiya he zengeg lavew pa he meupiya he ebpien kenà is dekelà he ketigeyunan. Is kedtehuza kenita te minge etew ne lavew pa he meupiya kenà is kegkeengkena ta te pelata wey vulawan.

²Is sepian wey pubri pudu midlimbag te NENGAZEN.

³Is etew he uluwanen, egketueanan din te edlikey emun duen kemeregenan he ebpekesugat kandin, iyan, is etew he wazè din utew emet ne kenà ed-eligu zutun, umbe ebpekebmeregen sikandin.

⁴Pinaagi te kenà kebpelavew te etew wey te kedtehuza zin te NENGAZEN, egkehimu he egkaangken din is dekelà he ketigeyunan, meupiya he zengeg, wey kelugayad te untung.

⁵Is ibayà te lalung he minge etew, ne iring te zalan he zugiyen wey zuen duen minge litag. Is etew he ebpekeziyù kenian he zalan ne ed-empingan din is untung din.

⁶Kinahanglan he ibansey ta ziyà te minge vatà is minge ulaula, he zait he ed-ul-ulahan, ne emun ebmegurang en sikandan, ne kenè dan edsuwey zutun.

⁷Is minge egkengaayuayu ne egkeveyveyaan te minge sepian, ne is minge ebpengutang uripen te minge neutangan dan.

⁸Is ebpemula te kelelalung ebpekeragun te kezeetan, ne kenè en ebpependezaat te zuma.

⁹Eduvazan te NENGAZEN is etew he kelelagan, su edtelewizen din is minge pubri.

¹⁰Emun ibpaawà diyà te inged is minge etew he sumpalit, egkaawà daan is kebpelewwewanà, kesevaan, wey is kebpein-insultuwà.

¹¹Is etew he lumpiyu is gehinawa zin wey menayù is kebpengagikagi zin ne egkehimu he emigu te hadi.

¹²Ebpurungan ebentayi te NENGAZEN is minge uluwanen, piru edezeetan din is minge pelanu te minge teruen.

¹³Mezakel is minge pesangil te tepulan. Kenè kun sikandin egawas su zuen kun erimaung diyà te gawas he edawi kandin.

¹⁴Is kegkagikagi te vahi he lebag ne ebpeketintal, iring te mezalem he vudsi, ne heini he vudsi ne egkeulug kayi is egkeepesan te NENGAZEN.

¹⁵Kineiya te vatà is kelelalung, piru egkaawà heeyan diyà te kandin pinaagi te kebmensuwa kandin.

¹⁶Egkepubri is etew he edèdaagen din is egkeey-eyuwan su wey meumani is ketigeyunan din etawa iyan din ebegayan is sepian.

Is minge Erubasa te Uluwanen

¹⁷Heini is minge lalag te uluwanen he minge etew. Peminega nu heini purungi zutun te kebpenurua ku kayi kenikew, ¹⁸su ebpekevegey heini kenikew te kelipey emun kenè nu heini egkelipatan. ¹⁹Ibpenurù ku heini kenikew guntaan su wey nu iyan meserigi is NENGAZEN.

²⁰Insurat ku is 30 he minge erubasa he ebpekevegey te ketau wey minge selembagan. ²¹Pinaagi kayi egketuenan nu ke hengkey is hustu, ne ebpekevegey ka te egkeserigan he minge tavak diyà te minge etew he ed-insà kenikew.

-1-

²²Kenè ka pemintahà te minge pubri, wey kenè nu sikandan pegpegesa ziyà te hukmanan, ²³su is NENGAZEN iyan edlavan kandan. Emun hengkey is ebeelan niw ziyà te kandan he kenà meupiya ne iyan daan ebeelan te NENGAZEN diyà te keniya.

-2-

²⁴Kenè ka mebpekid-emigu te etew he melemu egkepauk, ²⁵su kela ke mekeiring ka kandin, ne egke-uwit-uwit ka zutun he kineiya.

-3-

²⁶Kenè ka mebpesarig he iyan ka ebayad te utang te zuma. ²⁷Su emun kenè ka ebpekevayad, egkuwaan dan is hizegaan nu.

-4-

²⁸Kenè nu ihalin is taltal te tanè nu, he iyan kes taltal he intaltal te minge apù nu.

-5-

²⁹Is etew he metau he ebaal te edterebehuwen din ebpekepenilbi te hadi ne kenè diyà te minge etew zà duen.

-6-

23 ¹Emun egkaan ka zuma te pengulu, purungi nu is kebpenwalengwaleng nu. ²Emun buleguk ka, ne kenè nu pezumdumahi is gehinawa nu. ³Kenè ka meima te meupiya he minge keenen he indtangel zin, su kela ke igezam din dà te ulaula nu.

-7-

⁴Kenè nu pesubrahi is kedhagù nu tenged te kedtinguhà he medsepian ka. Kekenà, pugungi nu is keugelingen nu ne is-isipa nu ke hengkey is hustu. ⁵Is selapì, ne egkehanew te senge perè dà he iring te zuen din pakpak he edlayang pehendiyà te meziyù iring te vanug.

-8-

⁶Kenè ka megkaan etawa meima te keenen te etew he kuriput, minsan meupiya pa heini. ⁷Su is etew he iring kenian, ebelensiyen din is kezekelà te egkekaan nu. Ke sikandin, “Pengaan ka.” Piru kenè bes ebpuun diyà te meupiya he gehinawa zin is keggekegiya zin dutun. ⁸Umbe, kenè ka penigudu kaan su egkeutè nu is nekaan nu ne egkaawè is pulus te kedeliga nu kandin.

-9-

⁹Kenè ka mebpekidlalag te menge tulebung, su minsan metau ke pa he ed-lalag wazà pulus gihapun kayi ziyà te kandan.

-10-

¹⁰Kenè nu egawa is tanà te menge ilu pinaagi te kedhelina te menge kezaan he menge simintu kayi. ¹¹Su is NENGAZEN iyan mekegegehem he edlavan kandan. Iyan sikandin ebpengalang kandan kuntra kenikew.

-11-

¹²Pemineg ka emun eppenuruen ka su wey ka mebmetau.

-12-

¹³Kenè ka mebpenegana he ebmansu te anak nu. Su is kedlegkuta nu kandin ne kenè din ibpatey, ¹⁴kekenà, iyan idlugeyazi kandin te untung.

-13-

¹⁵Mama, melipayen a emun uluwanen ka, ¹⁶wey hustu is menge lalag nu.

-14-

¹⁷Kinahanglan he kenè ka egkesina te menge mekesesalà, kekenà, tehuza nu layun is NENGAZEN. ¹⁸Su emun edtehuzen nu sikandin, tutuu iyan he zuen meupiya he egkeperateng nu; kenà egkehimu he wazà pulus te menge tinguhè nu.

-15-

¹⁹Mama, peminega nu is egkegiyen ku. Penigudu ka wey ka mehimu he uluwanen ne isipa nu is hustu he ed-ul-ulahan. ²⁰Kenè ka mebpekiduma

te minge lelunguten wey vuleguk, ²¹su heeyan he kelasi te minge etew ne melemu he egkepubri. Edtulung dan dà ebpenlipezing, umbe iyan egketemanan dan is ebpekekukumbalè dan dà te tugak.

-16-

²²Peminega nu is ginikanan nu he iyan mid-uyag kenikew ne kenè nu iyan dà ivaras kandan is bà nu zà edsudia emun ebmegurang dan en. ²³Peniguduwi nu he maangken nu is ketutuanan, ketau, keggkemsu, wey kedsavut. Ne kenè nu heini iliwà te minsan hengkey he minge azen. ²⁴Utey igkelipey te ginikanan nu emun metazeng ka wey uluwanen ka, ²⁵lavi en is iney nu.

-17-

²⁶Mama, peminega nu purungi is egkegiyen ku, ne sunuza nu is minge ulaula ku. ²⁷Is bahi he ebelegyà te zengeg din, ne ebpekezezaat kenikew. Iring heini te mezalem he vitu wey meliget he vudsi. ²⁸Iring sikandin te tulisan he edtagad te egkebiktima zin, ne iyan sikandin hinungdan te kedlseselai te minge maama te minge esawa zan.

-18-

^{29,30}Hentei is mekehizuhizu he etew, peretebek, riklemedur, melemu he egkengepelian, wey layun dà merigà is mata zin? Iyan heini sikan is etew he lelunguten, he egkesuat layun he egezam te nekedselekawà he inumen. ³¹Kenè ka petintal te keriga wey ked-ilak-ilak te vinu ziyà te seled te vasu wey is ketaam kayi he ed-inumen. ³²Su emun egkelangut ke en, ne selakew en is egkegezam nu te lawa nu, iring te edhereg he uled he egkagat kenikew. ³³Ne minsan hendei ke zà meketengteng, ne kenà meupiya is ked-isip-isip nu. ³⁴Henduen be te ziyè ka medhizegà te varku he ziyà te lawed te zagat. ³⁵Ne egkeisip nu is: “Midsusumbag a, iyan, wazà a mevugel, midlelagkut a iyan, wazè ku gezama. Keenu ad buwa egkehuwasi su wey a mekeuman en maan mekeinum?”

-19-

24 ¹Kenè ka mesina te minge etew he lalung etawa tinguhà te kebpekid emigu kandan. ²Su iyan dà ed-isipen dan is kebpesipala wey edhisgutan dan is kedsinamuk.

-20-

^{3,4}Emun metau ka, egkevangun nu wey igkepeuswag nu is pemilya nu.

-21-

⁵Is etew he uluwanen dekelà is igkeugup din he med-iseg is kebpegegaga te minge ebpekidtebek, ⁶su kinahanglan dan is minge

sambag din te kebpekidtebek. Ne kelegmitan iyan ebpekezaag is mahabet is menge peresambag dan.

-22-

⁷Is tulebung kenè din egkesavut is mezalem he menge lalag. Wazè din igkesambag emun impurtanti is egkevitiyeraan.

-23-

⁸Is etew he ebpelanu layun te mezaat ne egkilelaan he iyan ebaal te kezeetan. ⁹Salà is minsan hengkey he pelanu te etew he tulebung, ne egkeepesan te menge etew is ked-undaunda.

-24-

¹⁰Emun egkeewaan ka te perateng te timpu te kemeregenan, tuus heeyan he meluya ka.

-25-

¹¹Kenè ka penegana te kedlibri te menge etew he wazà salà he midsintinsiyahan he edhimetayan. ¹²Egkehimu he ebpemarew ka he wazè nu metueni heini. Piru netuenan te Megbevayà ke tutuu ve is migkagi nu wey kekenà, su ebentayan ke zin ne netuenan din ke hengkey is diyà te isip nu. Ebelesan ke zin sumalà te nengeveelan nu.

-26-

¹³Mama, kaan ka te teneb su meupiya heini para kenikew, ¹⁴su iring keniyen is ketau. Su ke uluwanen ka, duen meupiya he egkeperateng nu ne kenà egkehimu he wazà pulus te menge penganduy nu.

-27-

¹⁵Kenè nu iringi is lalung he etew, he ebpeniid su ebpenulis diyà te valey te etew he metazeng. ¹⁶Su minsan kepipitu pa mepiley is etew he metazeng, iyan, layun sikandin ebpekeenew. Ne emun iyan is lalung egkepiley, kenè en sikandin ebpekeenew.

-28-

¹⁷Kenè nu ikelipey emun duen mezaat he egkeulaula te kuntada nu. ¹⁸Egkaahà te NENGAZEN is baal nu, ne kenè din heeyan egkesuatan; ne kenè din en edsilutan haazà is kuntada nu.

-29-

¹⁹Kenè ka mesemuki wey mesina te menge lalung he menge etew, ²⁰su wazà meupiya he egkepaabut dan, su is untung dan iring te sulù he egkeevukan.

-30-

²¹Mama, tehuza nu is NENGAZEN wey is hadi. Kenè ka medtampu te minge etew he edsukul kandan, ²²su egketik-awan sikandan te silut. Wazè nu metueni ke hengkey he kelasi te kemeresayan is ibpigada te Megbevayà etawa te hadi diyà te kandan.

Is Duma pa he minge Erubasa

²³Heini pa is duma he minge erubasa te minge etew he uluwanen: Kenà meupiya is kedhukum nu he zuen nu ibpelavi. ²⁴Emun egkagi ka he wazà salà dutun te nekesalà, ebpenrewakan ka wey egkepeukan ka te minge etew. ²⁵Piru emun ebpigedahan nu haazà is nekesalà, edtuvazan ka wey ed-uswag ka.

²⁶Is tavak he hustu ne tuus te tutuu he teleemigu.

²⁷Hunaa nu endama is igkeuyag-uyag nu, iring te pemuleey nu, ne human ka tukud te pemilya.

²⁸Kenè ka penistigus he kaatbang te idsumbung he siringan nu emun kenè ka zait he ebpenistigus dutun he kasu. ²⁹Kenè ka megkagi te, “Ed-ul-ulahan ku ziyà te kandin is mid-ulaula zin kayi te kedì, ne ibpevyad ku sikandin tenged te mezaat he mid-ulaula zin kayi te kedì.”

³⁰Nekesagad a ziyà te vevesukà te etew he tepulan he wazè din utew emet. ³¹Mid-erikumunan en heini te ribpes wey zugiyen he minge zezeisey he kayu, ne nerundus en is minge alad kayi. ³²Ne mibpurungan ku is-isipa ke maan is neulaula haazà is neehè ku, ne neisip ku is penurù he iyan is: ³³Is ed-isipen te etew he mevavè dà he kedlizepeng, mevavè dà he kebpeurek wey mevavè dà he kebpahareyharey su wey mekehimeley; ³⁴ne iring te ebpekeuma he tulisan he egkagumeenan is kewewezai.

Is Duma pa he minge Erubasa ni Solomon

25 ¹Heini pa is duma he minge erubasa ni Solomon he migkupyta te minge maama he sakup ni Hadì Hezekia he hadi te Juda:

²Ebentugen tew is Megbevayà tenged te minge egkengeulaula he wazè din ipzeyag kenitew; ebentugen tew is minge hadi tenged te minge ibpezeyag dan kenitew.

³Kenè ta egkesavut is ed-isipen te minge hadi su iring heini ketikang te langit wey iring kezalem te zagat.

⁴Ewaa nu is tangis te pelata, ne is etew he pandey te pelata ebpekehimu te gelemiten puun dutun. ⁵Iring din ded daan emun ibpaawà te hadi is lalung he peresambag din, ne egkelig-enan is kedumala zutun te hadi pinaagi te ketazeng.

⁶Emun sevaha ka te minge upisyal te hadi, ne kenè nu isipa is keugelingen nu he lavew tenged te nekepinuu ka zuma te dungganen

he minge etew. ⁷Deyzey pa ke egkegiyan ka zutun te hadi te zutun ka pinuu kenà ke egkegiyan ke zin te awè ka, ne egkepeel-elezan ka zutun te etuvangan te dungganen he minge etew.

⁸Emun duen egkeehè nu, kenè nu segugunà isumbung diyà te hukmanan su emun duen ebpekepenistigus he igkepeletew zin he nesayep ka ne zutun egkepeel-elezan ka.

⁹Emun ebpekedlawan kew te siringan nu, egkehimu ke ebpelewanè kew, piru kenè niw tudtula is in-eles niw. ¹⁰Su emun egketueanan heini te zuma, ne kela ke peel-elezi kew zan, ne egkezeetan is dengeg niw taman te taman.

¹¹Is lalag nu he edsungkad te hustu he timpu, iring heini te mensanas he vulawan he idsavuk diyà te selevukà he pelata.

¹²Is kedawey te etew he uluwanen te etew he egkesuat he ebpemineg mahal pa heini kenà te elahas he vulawan.

¹³Is egkeserigan he menunudtulà, ebpekepahagkap te egezamen te midsugù kandin, iring te megenew he wahig emun timpu te gulavung.

¹⁴Ne is etew he ebpenangdù he zuen ibegey zin, iyan, kenè din idlaus, haazà is penangdù din igkepetug-iring te gapun wey keramag he kenà egkezumahan te uzan.

¹⁵Is kebmepelevayen wey menayù he kekgagikagi ne ebpekeuwit te minge pengulu minsan te minge mezesen is gehinawa.

¹⁶Kenè ka mebpesubra te kegkaan te teneb su kela ke mekeutè ka.

¹⁷Kenè ka layun penumbaley ziyà te siringan nu, su kela ke meperahi sikandin ne egkeepesan ke zin.

¹⁸Is etew he ebpenistigus te tarù kuntra te zuma zin, ne ebpekezezaat iring te ispada, badas, wey panà.

¹⁹Emun timpu te kesamuk ne is kedsarig diyà te etew he kenà metinumanen, igkepetug-iring te ngipen he megaan en egkesepù wey iring daan te paa te pigket.

²⁰Is kedlengana te etew he utew egkeseeng, pinaagi te kekgentahi nu kandin, ne igkepetug-iring te edluwasen nu is kumbalè din dutun te timpu te megenew etawa edsevukan nu te sukà is pali din.

²¹Emun egkevital is kuntada nu, ipekaan nu, ne emun egkemezahan ipeinum nu. ²²Ne emun ebeelan nu heini, ne egkeeled sikandin kenikew, ne is NENGAZEN ebales kenikew.

²³Is keramag he ebpuun diyà te zizaya ed-uwit te uzan, ne iring dutun is etew he pereitik su ed-uwit te tudtul he igkesavà.

²⁴Deyzey pa is kedsivey ked-ubpa kenà is kebpekid-amur te esawa he peretebek.

²⁵Is kebpmineg te meupiya he tudtulanen he ebpuun diyà te meziyù, ne iring te ked-inum te megenew he wahig emun egkemazahan ki.

²⁶Is metazeng he etew he egkeuwit te lalung he etew iring te leveg he serebseb etawa meremerik he teheb.

²⁷Kenà meupiya emun ebpesubra ki te kegkaan te teneb, iring din daan is kedtinguhà he mezelligi ka layun te menge etew.

²⁸Is etew he kenè din egkeegen is suat din ne melemu egkezeeti iring te sevaha he inged he wazè din berengbeng.

26 ¹Kenà ereg he ebpenggiyew emun gulavung ne kenè daan edrendeng emun tiragun, ne iring kenian is tulebung su kenà dait he edeligen.

²Kenà ed-utengan te rawak is etew he wazè din salà. Iiring dà heini te tagbis he edlayang, iyan kenà edlatun.

³Kinahanglan he edlegkuten wey ebusalan is kudà wey asnu. Iring din is tulebung, kinahanglan he ebpigahan.

⁴Kinahanglan he kenè nu tevaka is tulebung emun tinulebung is kebpekidlalag din kenikew, su kela ke mekeiring ka kandin. ⁵Piru meupiya zaan ke edtevaken nu sikandin, su para metueni zin he kenà sikandin uluwanen sumalà is diyà te isip din.

⁶Is etew he idsarig din diyà te tulebung is kegketudtula te ibpesavut din, ne iring dà te edtempezen din is paa zin su samuk is egkeperateng din.

⁷Is erubasa he egkegiyen te menge tulebung ne wazè din pulus iring te paa te pigket.

⁸Kelelelungan emun idhiket nu ziyà te petik is batu; iring din daan is kedeliga te tulebung.

⁹Is erubasa he egkegiyen te menge tulebung ebpekezezaat iring te zugiyen he menge rasang he egwezan te langut.

¹⁰Kelelalung heeyan emun ebpeanaan nu is minsan hentei; iring din ke ibpeterebahu nu is minsan hentei he tulebung he edsagad.

¹¹Is asu, egkeenen din is ingkeutè din, iring te tulebung su ed-umanan din gihapun ebeeli is mezaat he vaal zin.

¹²Deyzey pa is egkepengkusan te tulebung he etew, kenà is etew he kunaan din ke uluwanen sikandin.

¹³Is tepulan, iyan kun kenè din igawasgawas dutun te valey su egkahandek kun sikandin he egkeizen te erimaung.

¹⁴Is tepulan he etew ne ebelvelikid dà diyà te katri zin iring te lekeb he egketulung egkewangigwangig is bisagra zin.

¹⁵Duen tepulan he menge etew he minsan is kedsungit dan te keenen ne igkepeguli zan.

¹⁶Is tepulan, egkeisip din he metau pa sikandin kenà is pitu he etew he utew hustu is kegketevaka zan te id-insà diyà te kandan.

¹⁷Is kebpesahugsahug te kesevaan te zuma; iring te ked-apul te ebpemengagat he asu pinaagi te kegewezi te telinga zin.

^{18,19}Is etew he ebinuangan din is duma zin, ne egkegiyen din he suyat din dà haazà, iring sikandin te ebunegen he henduen te edriyubriyub he vala te panà is ibpanè din he ebpekepatey.

²⁰ Egkeevukan is hapuy emun wazè din tavun, ne egkeengked is kesevaan emun ed-engkezan is kepemengituk.

²¹ Is uring iyan egkehimu he ebpekelangga, ne is tavun iyan ebpeketuvù te regreg, ne iring keniyàn is etew he peretebek su ebpeketuvù sikandin te rirù.

²² Is minge lalag te pereituk henduen be te utew metaam he keenen he utew ta egkesuati te ed-eveleng.

²³ Emun id-eles nu is mezaat diyà te gehinawa nu pinaagi te meupiya he kegkagikagi, iring ka te ziniyun he mibpekeplaan te pelata he kenà lunsey.

²⁴ Is kuntada, ne uvag meupiya is egkegiyen din, iyan, minsan pa ke egkepenù te mezaat is gehinawa zin, edtembunan din pinaagi te minge lalag din. ²⁵ Minsan pa ke utew meupiya he ebpemingegen is minge lalag din, kenà ereg he edtuuwan su utew mezaat is netagù diyà te gehinawa zin. ²⁶ Egkehimu he edtembunan din is mezaat he minge tuyù din pinaagi te akal, iyan, egketuenan ded is kelelalung din te minsan hentei.

²⁷ Is ebangbang para meulug is дума, iyan sikandin egkeulug dutun. Is edlilid te watu su wey melilizi is дума, iyan sikandin egkelikuan egkelilizi zutun.

²⁸ Egkeepesan te teruen he etew is minge etew he mibiktima zin pinaagi te kedtarütarù. Is etew he edigdig kenikew ebpekezezaat kenikew.

27 ¹ Kenè nu izantal is ed-ul-ulahan nu wey is meupiya he egkeulaula ziyà te kenikew te huziyan he timpu, su minsan pa is egkehitaù te sunud he andew wazè nu metueni.

² Kinahanglan he iyan edalig kenikew is дума he etew; kenà te iyan ka edalig te keugelingen nu.

³ Mevegat is batu wey mevegat daan is pantad, iyan, edhuna pa he mevegat is samuk he egkehimu he rimegas te kelelalung te minge tulebung diyà te kenikew.

⁴ Ebpekezezaat is pauk wey rerangit, iyan, edhuna pa is kepengelikud.

⁵ Deyzey pa is kedaway te egkesayep diyà te etuvangan te sevaha he etew kenà ke egkagi ka te, igkegagew nu sikandin piru ebey-anan nu zà sikandin.

⁶ Is mesakit he kedaway te tutuu he emigu duen meupiya he ketuyuan, piru is hazek te kuntada kenà egkeserigan.

⁷ Is egkahantey en, ne minsan is teneb, kenè en sikandin egenahan he egkaan duen, iyan, is egkevital, minsan is mepait, ne henduen be te meemis en is kegedgezama zin duen.

⁸ Is etew he ebpekeziyù diyà te valey zin ne kenè en ed-ulì, iring sikandin te tagbis he mid-engkezan din is salag din.

⁹ Is minge pehemut wey veyewà ebpekevegey te kelipey te gehinawa te etew; iring din ded daan is hustu he sambag te sevaha he emigu ne ebpekelipey kenita.

¹⁰Kenè nu lipati is emigu nu wey is emigu te amey nu. Ne emun ebpekebmeregen ka, kenè nu iyan peleguya is suled nu he nekeziyù kenikew, su tuwas pa he ebpeketavang kenikew is siringan nu, kenà is suled nu he nekeziyù kenikew.

¹¹Mama, mebpekeuluwanen ka su iyan heini ebpekevegey kedì te kelipey, ne egketavak ku is minsan hentei he edsudì kedì.

¹²Is etew he uluwanen egketuenan din emun duen piligru he egkehítavù kandin, piru is etew he kenà uluwanen ne kenà mevantey, umbe ebpekaantus sikandin.

¹³Emun ebpesarig is etew he iyan sikandin ebayad diyà te kenikew te utang te etew he wazè din mekilala, siguruwa nu he zuen din igkesandà kenikew, minsan is bisti zin, su para mesiguru nu he mekevayad sikandin.

¹⁴Is etew he iyan en igkepukew zin ke meselem is mezaging he kebpenuvadtuvad nu, ne ibpetug-iring din heini te kebpenrewaki kandin.

¹⁵Is bahi he peretebek te esawa zin ne iring te edtigisan he atep emun rendeng. ¹⁶Ne emun edewayen ta sikandin ne egkeiring ki zà te edawey te keramag wey te egkemkem te lana.

¹⁷Is putew ebpekepegarang te putew zaan, ne is etew zaan, iyan ibmetau te zuma zin.

¹⁸Is ed-elimah te kayu he higus ebpekekaan te vegas dutun te ed-elimahan din. Ne is suluguen he ebpurung ebpenilbi te egalen din ne egkezeligan.

¹⁹Iring te egkeehè ta is alung ta ziyà te wahig, pinaagi te keugelingen ta he gehinawa, egketuusan ta ke metazeng ki he etew wey ke kenà.

²⁰Kenà egkeengked is kebpeematey te etew; ne is suat te etew ne kenè daan egkeengked.

²¹Egketuenan is hustu he vulawan wey is hustu he pelata pinaagi te kegezami zuen pinaagi te hapuy, ne is etew zaan egketuenan is ked-etew zin pinaagi te kegkezeligi kandin.

²²Is tulebung minsan ed-iringen te pa te parey he ed-ey-eyazan ebeveyuwa su wey maawà is ukap, iyan, kenà gihapun egkaawà is ketutulebungì zin.

²³Pekeventayi nu wey kenè nu lemlemuwi is menge uyagen nu, ²⁴su is menge ketigeyunan wey kevantug, kenà edtaman te taman is kegkeengkena zuen te etew. ²⁵Egeraven nu is menge igkumpey nu; ne egkesuvul gihapun haazà is migeravan nu, su para zuen layun sagbet he egkekaan te menge uyagen nu puun te menge vuvungan. ²⁶Ebpekehimu ka te visti pinaagi te vulvul te menge kerehidu, ne ebpekepemasa ka te tanà pinaagi te halin te menge kambing nu. ²⁷Ebpekekuwa ka zaan te zekelà he gatas puun dutun te menge kambing para te pemilya nu ragkes is menge suluguen nu he vahi.

28 ¹Is etew he lalung tekew en ebpelaguy minsan wazà edal-as kandin; iyan, is etew he metazeng iring te erimaung su mevurut mulà sikandin.

²Emun egkeilis-ilis is menge pengulu ziyà te sevaha he ginhedian, tuus heeyan he mesinupaken is menge etew zutun. Piru ke zuen uluwanen he pengulu kayi, ebmelig-en wey ebpedayun is inged.

³Is pubri he edlislisezen din is iring din he pubri, ne iring sikandin te utew mereges he uzan he ebpekezezaat te menge pinemula.

⁴Is etew he kenà edtuman te Kesuguan, igkesuat din is kelelalung, iyan, is etew he edtuman kayi, igkeepes din mulà is kelelalung.

⁵Is menge etew he lalung kenè dan egkesavut is hustu he kukuman, piru is menge etew he edangep te NENGAZEN egkepurung dan mulà egkesavut is hustu.

⁶Deyzey pa is pubri he wazà duen igkesawey kenà is sepian he kenà hustu is menge ulaula zin.

⁷Is anak he edtuman te Kesuguan ne uluwanen, piru is anak he ebpekid-elukuy te wazè din pulus he etew, ne egkepeel-elezan din is amey zin.

⁸Is etew he ibpeuswag din is ketigeyunan din pinaagi te utew subra he kebpepursintu, is ketigeyunan he egketigum din, egkehimu he egkaangkan te etew he igkegagew zin mulà is menge pubri.

⁹Is minsan hentei he kenà edtuman te Kesuguan, egkeepesan te Megbevayà minsan is menge pengemuyù din.

¹⁰Is etew he edhimuwen din is paagi wey mekeulaula te mezaat is etew he metandang, ne egkeuney sikandin te mezaat he vaal zin. Iyan, is etew he wazà duen igkesawey ed-uswag mulà.

¹¹Is menge etew he sepian, ed-isipen dan he uluwanen en sikandan, piru is pubri he etew he zuen din kedsavut, egketuanan din ke hengkey he kelasi he etew is sepian.

¹²Emun metazeng is egkehimu he zekelà is kegehem din, ne henduen be te ibayew is menge etew tenged te kegkelipey zan, iyan, emun lalung is egkehimu he zekelà is kegehem din ne edliyasen is menge etew.

¹³Is etew he id-eles din is menge salè din ne kenà ed-uswag, iyan, is etew he idtug-an din wey ed-engkezan din te ed-ulaula is menge salè din, igkehizu sikandin te Megbevayà.

¹⁴Utey zeyzey is etew he layun din edtehuza is NENGAZEN, iyan, is etew he kenà ebpezumazuma, ne ziyà sikandin ebpekepevayà te kezeetan.

¹⁵Iring te edhiniger he erimaung wey ebpemendurus he bir is lalung he etew he edumala te menge pubri.

¹⁶Is pengulu he mesipala te menge sakup din iyan kes pengulu he kenà metau.

Piru is pengulu he kenà egkesuat he edsepian te kenà meupiya he paagi ne edlugeyazan te untung.

¹⁷Is etew he edsemuken te isip din tenged te kebpekevaal zin te mezaat pinaagi te kebpemumunù din, wazè din kelinew taman te kebpatay zin. Ne kenà sikandin ipetevangi te minsan hentei.

¹⁸Is etew he wazè duen igkesawey ne kenà egkekeizan, piru is etew he kenà hustu is ulaula zin ne megaan egkahanew.

¹⁹Is mevasuk ne ed-uzaren, iyan, is pegulen mulà ne egkeey-eyuwan.

²⁰Is etew he egkeserigan ne edtuvazan te Megbevayà; iyan, is etew he egègaanen din is kegketigayun din te zekelà, ne iyan egkepengkusan din is kegkesiluti kandin.

²¹Kenà meupiya emun duen edepigan nu. Piru zuen дума he menge etew he mibaal kayi tenged te midsipsipan sikandan, minsan deisey zà heini.

²²Is etew he legezen, egègaanen din is kedsepian din, iyan, wazè din metueni he iyan edtagad kandin is kewewezai.

²³Igkesuat pa te etew emun edewayen nu sikandin su wey mepenurù, kenà ke edigdigen nu sikandin.

²⁴Is etew he edtuu he kenà sayep emun iyan din dà ebpenekawan is amey zin wey iney zin, ne iring sikandin te tulisan.

²⁵Is etew he legezen ebpeketuvù te kesevaan, iyan, is etew he edsarig te NENGAZEN ed-uswag mulà sikandin.

²⁶Is etew he edsarig te keugelingen din ne tulebung.

Is etew he ebpenigudu para med-uluwanen ne kenà egkemenu.

²⁷Is etew he edtelewizen din is pubri kenà egkeeminan te minsan hengkey he kinahanglan din, iyan, is etew he kenè din en ebeliyen is menge pubri ebpenrewakan sikandin.

²⁸Emun lalung is egkehimu he edumala edliyasen is menge etew. Piru emun ebpematay haazà is menge lalung, ne iyan en maan edumala is menge metazeng.

29 ¹Is etew he kenà ebpezumazuma minsan layun en edewaya, ne iyan egkepengkusan din is egkerumpak sikandin diyà te kezeetan ne wazè en paagi wey megaud sikandin dutun.

²Emun metazeng is pengulu, egkelipey is menge etew, iyan, emun lalung is egkehimu he pengulu, egkengeseeng is menge etew.

³Is etew he zekelà is suat din he mebmetau ebpekevegey te kelipey ziyà te amey zin.

Is etew he ebpengumpadi te vahi he ebelegyà te zengge din, ne edhelhelasen din is ketigeyunan din.

⁴Emun iyan igkeseeng te hadi is ked-ikul te hustu he kukuman, egkelig-enan is ginhedian din, puru emun ebpeheheramham sikandin su egkesuat he edsipsipan, ne edezeetan din is ginhedian din.

⁵Is etew he edigdigen din is duma zin, ne iring te ebaal te lelevù su wey meuney melelevù sikandin.

⁶Is lalung he etew egkelitag te keugelingen din he salà, iyan, is etew he metazeng, ne egkanta te kegkeliyey zin.

⁷Is etew he metazeng midlevanan din is ketenged te menge pubri. Kenà heini egkesavut te etew he lalung.

⁸Is menge etew he sumpalit iyan edretem te kesamuk te sevaha he inged, iyan, ebmelinew mulà is inged pinaagi te etew he uluwanen.

⁹Wazà egkepeveyaan emun ebpeked-etuvang diyà te hukmanan is uluwanen he etew wey is tulebung, ne wazà kelinew zutun su haazà is tulebung ebpelelanget wey ebpemenulà.

¹⁰Is etew he utew egkesuat he ebunù, ne minsan is etew he ebpeninidtuwan edumutan din, ne edtinguhaan din te edhimatey.

¹¹Is etew he tulebung kenè din egkeegen is pauk din, iyan, is etew he uluwanen egkeegen din mulà is kandin he pauk.

¹²Emun ebpeming is pengulu te tarù he menge tudtul, ne egkehimu he lalung is langun he menge upisyal zin.

¹³Is pubri wey is ebpendaagdaag kandin neked-iiring dà su imbegey zà te NENGAZEN is mata zan.^a

¹⁴Emun metazeng is kukuman te sevaha he hadi diyà te menge pubri, epedayun is kedumala zin wey egkelig-enan heini.

¹⁵Is kebmensuwa te vatà pinaagi te kedlegkuta kandin, ebpekepenurù kandin ne egkehimu he uluwanen, iyan, emun pinesagdan is batà, egkepeel-elezan din is iney zin.

¹⁶Emun lalung is ebpemendumala, ne ed-uswag daan is ked-ulaula te salà. Piru heini sikandan egkezeetan, ne egkemetmetahan heini te menge metazeng.

¹⁷Mensuwa nu is anak nu, ne ebpekevegey sikandin kenikew te kelinew te gehinawa wey kelipey.

¹⁸Emun wazà lalag te Megbevayà he ebpenurù te sevaha he inged, wazà kayi kegkelinew. Utew zeyzey is menge etew he edtuman te menge ibpenurù te Megbevayà.

¹⁹Duen suluguen he kenà egkesuat he ebpenuruen pinaagi te kegkegiyi nu kandin, su minsan ebpekesavut ne kenè ke zin ebpemingegen.

²⁰Deyzey pa is egkepengkusan te tulebung he etew, kenà te etew he ebpengagi te wazà pulus.

²¹Emun ibpaangè nu is suluguen nu puun pa te kengunguhezi zin, iyan egkepengkusan is ebpekevegey sikandin te seeng kenikew.

²²Is etew he melemu he egkepauk, ebpeketuvù te kesevaan, ne layun dà ebpekehimu te salà.

^a 29:13 He ke vâ dà egkegiya, pudu zan is dezuwa, midlimbag te NENGAZEN.

²³Tenged te kebpelavew te etew, ebminus is pid-etawan din; iyan, tenged te kenè din kebpelavew, edtehuzen wey edeligen sikandin.

²⁴Is etew he kumpeniya te tekawen, iyan ebpekezezaat te keugelingen din. Minsan ibpepenangdù pa sikandin he iketug-an din ke hentei is duma zin, ne kenà sikandin edtug-an.

²⁵Is kegkahandek, ebpekezezaat te etew; iyan, ke edsarig ki zà te NENGAZEN, ne wazè ta igkemenù.

²⁶Mahabet is edsarig te hukum te pengulu, iyan, NENGAZEN dà is ebpekevegey te hustu he kukuman.

²⁷Is menge metazeng egkeepesan dan is menge lalung, ne is menge lalung egkeepesan dan daan is menge metazeng.

Is menge Erubasa ni Agur

30 ¹Iyan heini menge erubasa ni Agur he anak ni Jake he tig-Masa. Migkagi zin heini ziyà te ki Itiel wey ziyà te ki Ucal:

²“Iyan a kinepeglungan te langun he menge etew.

Is ked-isip-isip ku ne henduen be te kenà ked-isip-isip te etew.

³Wazà a mebpenginena he mehimu a he uluwanen, ne wazè ku zaan netuenan mehitenged te Megbevayà.

⁴Duen be etew he nekehendiyà te langit he midliku ded kayi te kelibutan? Duen be etew he nekekemkem te keramag etawa neketenges te wahig te manggad?

Duen be etew he nengelintau wey mekesavuk is menge zulunà te kelibutan? Emun duen nu nekilala, kegiya nu kedì is ngazan din wey is ngazan te menge anak din.

⁵Is kada lalag te Megbevayà ne egkeserigan utew.

Iring sikandin te kelasag te menge etew he ed-apat diyà te kandin.

⁶Kenè nu umani is ibpesavut din,

su emun ed-ul-ulahan nu heini, edsewayen ke zin ne wazè en igkevarew nu emun egkegiyen ke zin he teruen.”

⁷NENGAZEN, duen dezuwa he ebuyuen ku ziyà te kenikew. Emun egkehimu ne edhangyù a he ivegey nu kediey heini te kenè e pa ebpatay. ⁸Iyan heini: iyan ka metau he kenà a meketarùtarù. Ikezuwa, iyan ka metau he kenà a mehimu he utew egkeey-eyuwi etawa mehimu he sepian su iyan dà egkesuatan ku he zuen ku mekaan te kada andew. ⁹Su emun utew zekelà is ketigeyunan ku kela ke iyan ku haazà meserigi ne iyan ku sikew egkeiniyugan; ne emun pubri a, kela ke mekepemenakew a ne egkepeel-elezan ku sikew.

Nekeuman pa he menge Erubasa

¹⁰Kenè nu pemeyunga is suluguen emun ebpekedlalag kew te egalen din, su emun ed-ul-ulahan nu heeyan ne ebpenrewakan ka zutun te suluguen ne egkepigidahan ka.

¹¹Duen menge etew he kenà ebpekehimu he ebpengemuyù he tuvazi te Megbevayà is menge ginikanaan dan, kekenà, nasi dan dà ebpenrewaki.

¹²Duen daan menge etew he egkeisip dan he wazè en igkesewayi kandan, piru is tutuu meremerik is ulaula zan.

¹³Duen menge etew he utew en hambugiru, minsan is kebpenirapsirap dan ne henduen te hentei sikandan.

¹⁴Duen menge etew he henduen te vuaya, iyan baal zan is kebpemintahà te menge pubri.

¹⁵Is etew he zekelà is kadar zin ne iring te limatek. Layun dà egkagi te, “Begayi a!”

Duen daan tetelu etawa heepat he kenà egkeperahan:

¹⁶is iveyaan,

is bahi he kenà ebpekaanak,

is tanà su kenà egkeperahan te uzan

wey hapuy su kenà daan heini egkeperahan te idtavun duen.

¹⁷Is etew he ed-undaunda wey kenè din ebpemingegen is menge ginikanaan din ne edtuktukan te menge uwak is menge mata zin, ne edeesan te menge kulagu is minatey he lawa zin.

¹⁸Duen daan heepat he utew ku igkeinuinu ne kenè ku heini egkesavut:

¹⁹Ebmenumenu is kulagu he mekelayang diyà te hewhewanan,

is uled ebmenumenu he ebpenanap diyà te menge vetuwen,

is barku ebmenmenuwen he mekegampung diyà te zagat,

wey ebmenmenuwen te kenakan he mekepengulitawu te raga.

²⁰Iyan heini ed-ul-ulahan te vahi he mengungumpadi: Ebpehilavet sikandin te zuma he maama, ne kegkeipus dutun ebpemezigu ne ke sikandin diyà te esawa zin te wazè din mid-ulaula he mezaat.

²¹Duen tetelu etawa heepat he kenà egkaantus te menge etew kayi te kelibutan:

^{22,23}Is suluguen he nehimu he hadi,

is tulebung he neezenan te minsan hengkey he egkesuatan din te egkaan,

is egkengeepesan he vahi he neesawa,

wey is uripen he vahi he ebpekeliwan te vahi he tegiuripen kandin.

²⁴Duen heepat he zezeisey he linimbag, iyan, utew memetau:

²⁵Is menge lemetik, minsan dezeisey zà wey meluya sikandan,

ebpeketicigum dan te keuyagan dan timpu te gulavung,

²⁶is menge badir, kenà sikandan memezesen, iyan, diyè dan ebaal te

ubpeey zan te vetuwen,

²⁷is menge terapan, wazè dan pengulu, iyan, egkesevaha zan emun

edlayang dan,

²⁸is menge telètà, melemu zà he ed-emien, iyan, diyè ta egkengaahà te turugan te hadi.

²⁹Duen tetelu etawa heepat he minge linimbag he hambugen ke edhipanew:

³⁰ is erimaung, iyan utew mezesen te langun he langgam he wazà
igkahandek,

³¹ is lumansad he manuk,
is meemahan he kambing,
wey is hadi he edhuna te minge sundaru zin.

³²Emun nekevaal ka te tinulebung tenced te kebpelavew nu, wey emun
ebpelanu ka te mezaat ne engkezi nu heeyan! ³³Emun edtulangan nu
egkutawa is gatas egkehimu heini he mentikà? Ne emun edsumbagen nu
is izung te дума nu kenè be edsengguwen man hei? Umbe emun ebaal ka
te igkepauk te sevaha he etew, iyan heeyan ebpuunan te samuk.

Is minge Erubasa ni Hadi Lemuel

31 ¹Iyan heini minge erubasa ni Hadi Lemuel he tig-Masa, he
impenurù kandin te iney zin:

²Mama, neetew ka he iyan tavak te minge kebpengemuyù ku.
Migkegiyan ku sikew he kenè nu ³usiki is timpu wey selapi nu para te
minge vahi, su iyan sikandan hinungdan he nezeetan is minge hadi.

⁴Lemuel, kenà dait he ed-inum is minge hadi te vinu. Kenà dait he
edtinguhà is minge pengulu te minsan hengkey he ebpekelangut he
minge inumen. ⁵Su emun egkelangut sikandan, ne kela ke melipati zan
is minge kesuguan, ne ed-ewaan dan te ketenced is minge pubri. ⁶Iyan
ereg he ebpelelangut is etew he egkeewaan en te perateng, wey mesakit
is gehinawa zan. ⁷Ereg sikandan he ed-inum te vinu su wey zan melipati
is kewewezai zan ne wey zan kenà metenuzi is minge elentusen dan.

⁸Levani nu is ebpekevenar he mekehizuhizu he etew, he kenà metau
he ebpengetezengan he iyan ebpekeugup kandin. ⁹Emun egkukum ka ne
ipeikul nu te hustu he kukuman, ne levani nu is ketenced te minge pubri.

Is Buutan he Esawa

¹⁰Is buutan he esawa mahal pa kenà is minge rubi, iyan, utew meregen
he ebpen-ahaan.

¹¹Is maama he buutan is esawa zin, utew zekelà is kedsarig din dutun
te esawa zin, ne kenà sikandin egkegansi.

¹²Is buutan he vahi ne taman en te kebpatey zin, ne kenà sikandin ed-
ula-ula te minsan hengkey he ebpekezezaat te esawa zin.

¹³Megied sikandin he ebpemaal te manggad he welin wey linu.

¹⁴Igkepetug-iring sikandin te varku te minge nigusyanti; ne ed-uwit
sikandin te keuyagan minsan te meziyù is ebpuunan din he minge inged.

¹⁵Merusirem pa ne ed-enew en sikandin is ed-andam te egkekaan para
te pemilya zin, wey egkegiyan din is minge suluguen din he minge vahi
ke hengkey is ebeelan dan.

¹⁶Metau sikandin he ebpilì te tanà, ne ebpemesahan din heini. Ebpepemuwaan din heini te paras he ebpemesahan din te selapì he netigum din.

¹⁷Meviserwiser sikandin wey utew mesigudu he edterebahu.

¹⁸Metau sikandin he ebpetigayun, ne mesigudu sikandin he edterebahu su taman en te ebmerusirem.

¹⁹Iyan en sikandin ebpenhavel te ebeelan he kumbalà.

²⁰Igkegagew zin is menge pubri wey ebpinginahanglan.

²¹Emun timpu te megenew, ne kenè din igkeseeng haazà su zuen mekepal he manggad para te pemilya zin.

²²Ebpengavel sikandin te para te idempas diyà te hizegaan. Ne ebivisti sikandin te mekempet wey mahalen.

²³Diyà te inged dan, ne telehuzen is esawa zin wey sevaha te menge edlingahaan dutun.

²⁴Haazà is bahi ebpenahì te mekempet he menge visti su manggad he linu, wey ebpemaal zaan sikandin te vakes ne haazà pudu zin ibpemelegyà diyà te menge tumitinda.

²⁵Melig-en sikandin wey edtehuzen, ne kenè din igkehandek is egkehitavù te huziyan he menge andew.

²⁶Emun egkagi sikandin ne egketuusan ta he uluwanen sikandin, ne meelima sikandin he ebpenurù.

²⁷Megied sikandin, ne edsusiyen din ebpurungi is dutun te pemilya zin.

²⁸Utew sikandin egkezeligi te menge anak din wey te esawa zin. ²⁹Ne egkagi is esawa zin diyà te kandin te, “Mahabet he vahi is meupiya is menge vaal zan, iyan, kenè dan ebpekerepeng kenikew.”

³⁰Is kekempet te vahi ebpekelimbung, ne edlavey zà. Is bahi he edtahud te NENGAZEN ne iyan dait he edeligen.

³¹Dait sikandin he edsuhulan tenged te meupiya he menge vaal zin wey edeligen diyà te mezakel he menge etew.